

少游詩存

張錦麟

先生字瑞夫、別字玉洲、鄉籍龍江、與兄錦芳同居會城。錦麟聰慧絕倫、甫十歲通群經。兄弟相切磋、名並起、清乾隆三十三年戊子、公元一七六八年舉人。性孤介、常閉戶與古人角鼓旗、獨與胡亦常訂莫逆交、亦常早死、錦麟哭之慟、逾年錦麟亦卒、年僅二十九、海內惜之、著有少游詩百八十篇。列傳見咸豐縣志、詩章見鄒崖逋者鈔讀之嶺南詩存。

壞舟天柱灘

千山迭迎送、一重復一掩。沙明樹森森、岸闊雲泔泔。景色佳有餘、過客得一貶。稠灘萬暗石、鬥怪藏澗沼。鋒稜露戟牙、刻削出圭剡。順流偶不戒、失勢鳥投罨。同行性命憂、我僕手徒斂。一呼恰航來、正賴近崖廣。天公本無心、豈爲我設險。虛船偏不怒、飄瓦技何慊。去帆捷有神、倏忽過崖隙。叢祠競勸禱、此意毋乃諂。波神或吾規、途窮示其漸。平生任流坎、有命夫何玷。短篷暫灣跽、跛腳擁衾篔。回看破冢地、月黑燦星點。棄置得安眠、夜夢不成魘。

湖心亭

湖光如雪靜無波、綠酒紅亭倚醉歌、三面青山四圍水、藕花香處泊船多。

渡江

前身應是江南客、纔見金焦喜欲狂。一月風沙隨曉夢、半空樓閣出秋光。地連荆蜀開平遠、天入松寥接混茫。誰道東遊可乘興、早聞仙鶴化朱方。

平山堂

綠楊城郭雨初收、千里青渠碧玉流。白藕花中藏淺檻、青山影裏漾文舟。二分月自如前度、三過人今感舊遊。聽唱孤鴻煙雨曲、江南江北入新秋。

荔生題詠

張思植

先生字荔生、鄉籍龍江、清乾隆進士張錦芳之子、道光壬午公元一八二二年歲貢、與兄思齊俱能詩善書畫、事略見咸豐縣志、詩章見南海余少飄編之廣東歷代詩鈔。

爲王雪巢題秋江垂釣圖

曾信陰鏗觀釣詩、滄浪回首費尋思、誰令摩詰新圖出、正是秋江獨立時。

又

竟日垂綸魚有無、旁觀人未忘江湖、瓣香好禮任公子、不向煙霞作釣徒。

荷香館題詠

張如芝

先生字墨池、號墨道人、鄉籍龍江、清乾隆戊申公元一七八八年舉人。乃張錦芳之姪、幼受錦芳濡染、能書能畫、論者嘗以與黎二樵南海謝里甫並推之、時居廣州西泮塘、榜其居曰荷香館。事略見咸豐縣志、詩章見南海余少飄編之廣東歷代詩鈔。

題畫截句

無多濁酒風吹醒、且暫忘機息野亭、一種天然好聲色、鳴泉不斷暮山青。

又

落花如雪點苔衣、江水悠悠沒釣磯、誰向柳陰停短棹、嬉春人散笛船歸。

又

筆掃秋山墨著煙、一林疏樹漱涼天、年來心跡歸平淡、可識先生書畫禪。

又

紅藕花開水檻涼、道人邀客到湖莊、尋常一樣談玄理、坐對荷花遠更香。

玉峰詩鈔

張琳

先生字逸芳、鄉籍待考、清代廩貢生、署德慶州訓導。性情專一、房無侍姬、年方三十喪偶、以有子女、竟不復娶、論者稱之。著有玉峰詩鈔、見番禺凌揚藻評輯嶺海詩鈔卷廿二

猛虎行

前有猛虎、談者變色。或假其威、或傳之翼。弱肉而強食、行人皆悚惕。我聞猛虎、穴伏山岨。今者盤踞、橫於康衢。虎之出遊、常在昏暮。胡恃爪牙、白晝恣暴。眈眈視耶、逐逐欲耶。疇稱使君、化而畜耶。疇爲苛政、比而酷耶。

過漁塘海懷黃孝子名虞賓明代龍山沙富人葬於鳳山之麓

人生天地誰不死、死乃澌然草木比。惟有倫常赴義身、生氣千秋存不毀。君不見沙村孝子方髻齡、扁舟隨父商羊城。漁塘海闊風浪惡、父驚失足沉滄溟。孝子哀號急赴救、投淵性命鴻毛輕。不知有身知有父、涉險蹈危何暇顧。風浪瀕洞感至誠、父出兒翻淹水府。但得親生死亦安、猶勝鮮民痛何怙。五尺微軀蛟蟹避、三日還鄉鬼神護。吁嗟乎、士談忠孝不乏人、臨危幾見能舍身。急難之中見真性、成仁取義爲完人。鄉賢列祀歸童孺、千秋名並曹娥女。我來江上招英魂、巨浪汹汹嘯風雨。

西嶽

五千餘仞碧峻嶒、縹緲三峰望裏明。白帝真精通上界、黃圖積氣擁西京。天池飛雨風雷起、仙掌撐雲日月擎。靈洞好尋毛女伴、茅龍共跨御風行。

北嶽

恒山高峙冀方尊、壁立雙崖石窟存。千里嵐光浮朔漠、萬重形勢鎖并門。上方冰雪炎天結、北極星辰絕頂捫。坎德自饒雲雨澤、好從太乙探真源。

純軒詩存

張臣

公字衍秀、號純軒、鄉籍龍山沙富、清乾隆庚子、公元一七八零年副貢、官歷瓊山教諭。事略詩章、見一九三五年乙亥溫肅輯錄之龍山詩錄卷上。

天湖公婆石石在左羅帶二石聳若公婆然因以名之

疑幻三生舊日魂、皤然峰際立朝昏。情忘歲月形骸古、象有兒孫遠近存。縱不能言人亦仰、曾無相識語皆尊。南宮遊屐如經此、下拜應知語後昆。

過忠諫公墓志感

冷落忠魂此地埋、荒城那忍復言佳。不焚諫草名思正、獨伴豐碑字尚楷。碧血千年留一色、蒼松幾樹勁層崖。萋萋滿目王孫逼、卻刈何遲感素懷。

過吳貞女墓

山經睡犬日蕭蕭、憑弔芳魂何處招。太息浩波沉鳳偶、終知貞節跨虹橋。蒼涼碑碣漫風雨、零落松楸委牧樵。到底英靈長耿耿、至今行客仰高標。

竹枝詞

呼郎早趁大岡墟、妾理蠶繅已滿車、記問洋船曾到否、近來絲價竟何如。  
金紫峰高石路長、中天積翠護慈航、四圍兒女頻相約、好趁春晴禮法王。  
漠漠桑田一望賒、沙村深處是吾家、客來頗勝披風月、漱玉泉烹冷水茶。  
岡園多傍紫峰西、菜圃瓜田極整齊、最愛廟前新莧美、怪他索價倍豚雞。  
秋來下種值先償、絕頂慈菇出蜆塘、販罷何曾煩上市、不愁司秤轄投行。

橫蜆塘在清寧里內慈菇最美欲買者須先付定金

忽聽雞聲詣帝宸、那堪廟巷莫容身、問杯求卦聲方歇、急向階前索解人。

磬池詩草

張嘉猷

公字家善、鄉籍龍山沙富、嘉慶庚午、公元一八一零年舉人。著有磬池詩草、見乙亥溫肅輯錄之龍山詩錄下卷。

大廟峽

朝發見牛塘、日出照蘭橈。北風吹峽石、來作兩峰卓。峻嶒若猛士、守險列矛槊。我舟逆流上、喧囂與撐桡。驚颿蕩凍靈、駭浪響飛雹。忽聞管絃聲、短纜斷如斲、作勢少辟易、賈勇復騰蹕。再接乃再勵、一進旋一卻。持鐵守隘罷、奪門斬關數。出險瞰迴湍、怒將篙竅濯。回首崖樹間、朝暉掛殿角。

登海珠得月樓

夜月寒生海、危樓逼太清、下吞南斗氣、雄懾越江聲。檻影遮漁火、燈光入雉城。十年弦管夢、高臥寄閒情。

庚嶺觀曲江公所植松

一埭蒼松雜老梅、依然風度見林隈。骨無枯朽真堅操、寒不能凋始大材。日掛尚瞻金鑑在、雪圍深恨玉環來、至今長蔭陽門路、徒倚盤桓未忍回。

禹圖詩草

張洛書

先生字道存、號禹圖、鄉籍龍山沙富、清代諸生。事略詩章、見溫肅輯錄之龍山詩錄卷上

睡燕

梨花院落春風輕、隱臥花茵對落暉、故國飄零王謝盡、幾回殘夢繞烏衣。

南漢宮詞

月落南宮冷翠蛾、夢迴欹枕聽笙歌、荔枝洲接昌華苑、何處君王輦跡多。

雲巢詩存

張青選

先生字商彝、號雲巢、鄉籍龍江、少喪父、即勵志顯揚、清乾隆五十四年己酉、公元一七八九年舉人。官歷直隸按察、兩淮鹽政、有善績、生平慷慨尚義、能周人之急、道人之善、愛才禮士、敦本睦族、尤以救水患、賑歲災、歿後民爲立祠。列傳見咸豐縣志、詩章見鄒崖逋者鈔讀之嶺南詩存。又見徐世昌編之晚晴移詩匯卷一百零七。

題朱少仙獨坐圖

天地一蘧廬、悠然得靜虛。嬾尋三徑竹、閒廢半床書。抱膝成孤往、澄心見太初。能知此中趣、談理定何如。

抵南安

到此家鄉近、一時懷抱開。灘隨山勢盡、人逐雁聲來。回首西湖隔、關心白髮催。明朝過大庾、應見嶺頭梅。

吟秋館詩鈔

張思齊

先生字賢仲、號無山、鄉籍待考、清代優貢、著有吟秋館詩鈔傳世、事略與詩、見徐世昌編之晚晴移詩匯卷一百二十九。

峽江

一水穿雙峽、孤城隱亂山。暮天聞水碓、斜日掩柴關。地憶巴幽舊、溪如碧玉環。欲尋梅福宅、應在白雲間。

秦郵道中

三十六陂水、孤城一覆盂。柳陰沿岸密、山色過江無。井鍊仙人藥、波浮明月珠。樊梁溪景好、畫本借倪迂。

鴻雪齋詩鈔

黃丹書

先生字廷授、號虛舟。鄉籍大良。清乾隆六十年乙卯、公元一七九五年舉於鄉。歷任開平訓導、粵秀書院監督院事、一時文風丕振、造就人才不少。與同邑張錦芳、黎二樵、番禺呂石颿、並稱四大家。嘉慶四年、二樵病倒、虛舟剛自京師回粵、即到弼教鄉訪候、二樵即以其身後事撰述行狀相託、可見其二人相交相知之深。虛舟於餘事詩、書、畫、都有其造詣之處、畫則山水蘭竹、書則真、草、篆、隸、無不清雅當行、遺著有鴻雪齋詩文鈔、及胡桃齋詩餘各一卷、列傳見咸豐縣志、詩章見鄒崖逋者鈔讀之嶺南詩存。

爲何葭州畫竹葭州用東坡題晁補之所藏文與可竹三首韻見贈次韻奉答

坡仙曾有言、野竹如幽人。古來畫竹者、說法皆現身。我幸無俗骨、與竹相知新。襪材倘萃我、樂此寧疲神。

又

書畫同一源、變化靡不有。君看鐵鉤鎖、法本元和柳。我愛夏太常、筆挾風雨走。若以古書論、亦是歐虞手。

又

與君苦吟詩、得味如僧粥。不待飯顆嘲、自覺瘦於竹。玉版試同參、頗勝對苜蓿。一笑看墨君、汝相非食肉。

題謝雲隱聽瀑圖

在山泉水清、出山泉水濁。誰能城市中、翛然離塵俗。先生風骨真癯仙、飄飄遊戲下九煙。忘家靈運奚足道、絲竹未覺東山賢。古心古貌長潦倒、三尺瑤琴據梧好。不遇知音不肯彈、自向空山寄懷抱。懸崖百尺垂玉龍、噲呖鞞鞞酣笙鐘。哀猿幽鳥盡喑啞、妙聲髣髴蓬萊宮。

我昨飛帆泝彭蠡、匡廬九疊雲霧裏。黃巖咫尺慳曳筇、空詠銀河愛仙李。謁從人海歸故邱、揚子一區苦隘湫。夢裏輪蹄猶歷鹿、愁邊兒女更呶嘍。羨君向平願早畢、五岳胸中時突兀。洞天福地何處無、把臂真須入林密。我欲蠟屐來相尋、從君蹋遍青瑤簪。東樵水簾高崎嶇、西樵噴玉幽且深。好將世外許由耳、飽領雲山韶濩音。

葭洲用東坡謝蘇自之惠酒韻見謝饋酒次韻奉答

孔群事不了麴孽、得米猶從朋舊說。東籬悵望亦偶然、泉明豈受江州憐。文章勳業人所忌、尚有口腹能邀天。君看古來隱杯杓、此中供養無不全。蠟屐幾緡阮孚癖、弄石滿袖襄陽顛。多取甯爲造物怪、視彼世好差獨賢。先生固是酒中達、隨時學佛還學仙。瓦壇分餉何足道、聊憑酒味參詩禪。我雖不飲舌常在、半甌花乳浮輕圓。賞花蹋月出新句、素琴一鼓必合絃。我生涉世取適意、螻蟻侯王等如寄。眼前服食皆神仙、痴人浪說蓬壺異。醯雞舞瓮漫相哂、竿木逢場聊作戲。不如更到無何鄉、懶覓無功醉鄉醉。

題余丹山梅妃弄簫圖

柳葉雙眉工媚嫵、兩宮侍女顏如土。霜綃貌出餘光輝、想見驚鴻舊時舞。一枝橫吹龍頸長、昨宵拜賜來上陽。梅亭春好奮玉手、霏霏香雪沾衣裳。君不見淋鈴夜雨巴山下、三郎最是知音者。清平奏罷放青蓮、何須作賦如長門。樂府猶存珠一斛、較量何似梁州曲。漁陽鞞鼓爲誰來、小苑梨花吹紫玉。

朝貴延致辭不就（見龍山陳緯南清詩拾萃）

馬鳴媚其曹、雁飛各求群。明星燦東方、思見勞勞人。問君何所營、愴然難具陳。

華子岡（見粵東詩海卷九十五）

杖策華子岡、松風襲衣袂。歸來踏殘月、巷犬一聲吠。



為學心難滿  
 浮生理可齊

91.5×20cm 紙本

黃丹書

蘭竹圖

隸書五言聯



安心竟齋詩集

黃玉衡

先生字儀徵、一字伯璣、又字小舟、別號在菴、鄉籍大良、黃丹書長子。清嘉慶辛未、公元一八一一年進士、官翰林院編修、浙江道監察御史。弟玉衡、亦舉京兆、玉昆金友、並稱於時。公元一八二零年、玉衡自京回里、不幸途次廣信於舟中病逝、年僅四十三歲、時人惜之。事略見咸豐縣志、詩章見廣州陳永正主編之嶺南文學史。

濂泉寺

陰森巉層崖、窈窕列峻陞。溟溟亂雲合、豁豁蒼壁啓。岩泉散珠帘、山骨濯天灑。初從月窟落、漸與山根抵。高下紛奔騰、漣漪自傳遞。巨石古雪寒、怒湍青兕觥。坐臥時俯流、坦率偶露髀。小魚見人影、潛身伏石底。藻腳長如繩、霜根清若洗。薄游空道心、爽氣豁塵眊。及此半日閒、不負山僧後。振衣下阨、歸路風泚泚。

過呂子羽上舍翔樂潛山莊

南郭行吟去、江天月一痕。清秋何處笛、紅葉幾家村。雲氣涼生袂、溪聲曲到門。主人迎我笑、畫理得深論。

晚晴

雨氣淨群綠、花香霏一庭。清甌浮淡月、涼几臥繁星。燈影獨搖碧、蟲聲深隱青。明朝擬聯騎、鬢景眺江亭。

烹雪

屋角晴雲吹不動、小院無塵立深凍。一痕瓊屑瀉盤明、幾派濤聲隔窗送。

前題之二

玉洞金山空復尋、天教妙品供清吟。重帘乍卷香風散、縷縷寒煙過竹林。

江城六首之一  
百里膏腴地、傷心付劫灰、連山烽作戲、中澤雁流哀。一月春糧去、千艘贖水回。似聞鄰婦哭、愛女不歸來。

南歸雜誌十首之一

衝寒幾日到齊都、登陟真憐我馬瘠、賴有良朋同逆旅、未須長路歎羈孤。采風欲訪田何宅、遍地驚看鄭俠圖。索米長安曾不易、竭來誰料更如珠。時山東省大饑

與吳秋航夜話感贈

襟期落落更誰親、風雨孤燈筆有神。北野幾人愁伏驥、南溟無地寄修鱗。難將大葯回玄鬢、但恃群書忍赤貧。寸寸挽強真不易、艱難吾亦百年身。

前題之二

寒柝沉沉幾度過、紅燈影裏起悲歌。人如落日聰明滅、交到中年感慨多。共識揚雄文似者、其如李廣數奇何。著書自是名山業、莫任流光付逝波。

戰古堂集

黃璞

先生字同石、鄉籍待考、清代太學生、著有戰古堂集、詩章見嶺南詩存及粵東詩海。

峽雲

峽口春初暝、孤帆影共閒。石堆天一罅、風斷水中間。雨復幾時至、鶴其何處還。夢中神女妒、飛不到巫山。

遊俠詞

十載少還家、天涯皆舊路、妻孥送出門、上馬不回顧。

行旅吟

黃開銓

先生字品旋、鄉籍待考、清代諸生。見溫汝能纂輯之粵東詩海卷九十五。

南雄旅邸遇董友人話舊

驛路相逢晚、談心坐夜清、溪流高閣響、月上小窗明。貧賤知交少、浮沉笑此生。關山千萬里、斗酒緩君行。

長夏旅舍感懷

伏枕南窗下、羈懷強自歡。燭銷遙夢斷、月落五更殘、淚每思親在、書頻寄弟看。家人恒念遠、誰與報平安。

綠秀軒詩草

黃廉

先生字從清、一字南浦、鄉籍待考、清康熙年間太學生、及北闈不遇、再無意科名、即遍遊齊魯吳越荆楚諸勝、著有綠秀軒詩草。見番禺凌揚藻評輯之嶺海詩鈔卷六。

金陵懷古同杜司馬松風葛明府新陽高少尹又亭賦

江蹲石虎舊山川、地瘞金人死浪傳。萬井落花空帶雨、六朝春草自凝煙。景陽荒廢埋鐘鼓、芳樂昏淫剩市廛、大笑天山勞望氣、淮流經鑿更澄鮮。

捫虱堂集

黃蔭

先生字伯藉、一字珠江、鄉籍待考。平生以負瑰抱奇、鬱不得洩、只會遊於粵西幕府、顧自生非用世、因往往恣於杯酒、或放情漫罵、使聞者弗堪、毀之者在所多有也。惟詩文才氣、對事物之義理枚正、仍未嘗不令人俯首至地。見番禺凌揚藻評輯之嶺海詩鈔卷十六。

西遊雜詠

雨載蒼梧是舊遊、前途又泊繫龍洲。文章無價猶經稅、風雨多情自入舟。故國夢魂思伏枕、

山城煙月倦登樓。思鄉盡日人東望、飛燕飛鴻待好秋。  
四面雲山一望中、平南晴日好東風。龍門水急如天落、銅鼓聲高夾岸同、盒盒檳榔分櫂子、盤盤黍米換漁翁。煙波歲月人生事、懷古思鄉付酒筒。

寄薛成光

十年肝膽友、一日即三秋。午夜寒松月、孤高兩地愁。關山遲雁足、風雪敵貂裘。何以慰相感、江邊浮白鷗。

瑞亭伯署中對鶴

水雲淡孤影、如我一身閒。同憶舊時夢、相看何處山。去家琴未典、薄宦俸寧慳。十載忘形友、昂藏天際還。

歸自粵西過宿凌藥洲潭溪柘陰草堂

一別羊城又五年、幕遊雲樹杳如煙。談生永漏風生席、坐對孤檠月在天。文字尚求渣滓去、閭閻欣幸弟兄全。亦知寡過吾人事、刻厲多妨戾未捐。

剪燭分題興不勝、詩腸頻熱酒三升。塞鴻似逐新張翰、社燕如俛舊少陵。歲月未徂還可待、風塵甘老豈無憑。來朝擬訪和光寺、小住人呼有髮僧。

青年吟

黃懷

先生字仲思、一字螺峰、伯藉胞弟、爲清代布衣、與兄並有詩名、惜天不永年、僅二十二乃卒。見番禺凌揚藻評輯之嶺海詩鈔卷十六。

送李文衛歸郴州

青蓮公子留不住、別我鼉江水一方。城市煙花春對酒、江湖風雨夜連床。才高自擅禰鸚鵡、運蹇誰馳郭驢驢。他日停雲應有賦、陽春難和愧枯腸。

筆山堂詩

蘇珥

先生字瑞一、號古儕、晚號睡逸居士、鄉籍碧江。祖上遇字允升、豁達好善、宗族多受推解者、家以是貧。父士豪、好異書古刻。珥生七歲即能文博書、清雍正初、珥年十三、即受知督學、乾隆三年戊午、公元一七三八年舉人。與同邑羅天尺、陳海六、南海何夢瑤襄助校閱、稱惠門四俊。以母老、無意仕途、鄉居講學、束脩所入、有餘則用以購書、著述有宏簡錄辨定、筆山堂類書、古儕雜鈔、明登科入仕考等。居恒簡脫、不修容止、吟哦之外、且擅書法。列傳見咸豐縣志、詩章見鄒崖逋者鈔讀之嶺南詩存。又見溫汝能纂輯之粵東詩海卷八十一。番禺凌揚藻評輯之嶺海詩鈔卷七。

瓜州阻雨

歷盡江南第幾關、瓜州無那滯前灣。浮萍暫梗風翻浪、倦鳥難歸雨暗山。欲借漁簑尋客路、漫沾村酒破愁顏。醉中高臥來清夢、夢到高堂著綵斑。

城南水次漢川老友過訪

衰病疏朋輩、多君到舊林。相攜一樽酒、共話百年心。風暖春方半、燈紅夜未深。興來同剪燭、連榻事高吟。

題景聞和尚桃花獨立圖

作飯曾憐計太愚、爭如作字覓擔夫。於今不是同痴漢、勘破元機相亦無。

贈凌貴卿漢亭

九疑風雨暗崎嶇、八節波濤險有餘。世路合裁招隱賦、俗情催廣絕交書。傳聞入市人成虎、親見張弧鬼滿車。舊約耦耕堂願築、平田龜坼又何如。

柳塘吟館題畫詩

蘇六朋

先生字枕琴、號怎道人、又署羅浮道人、鄉籍南水。亦清代道咸間、與同邑蘇仁山並稱一時畫怪。風格往往脫離一般高山流水之天賦自然、高人逸士之詩酒風花、而不嫌俚俗、不拘禮節、常常寓筆於市井街頭、以勞苦大眾、盲人爭路爲對像題材、刻劃暴露人生百態、衆生色相、實開今之漫畫世界、以先覺覺後覺者。六朋設有柳塘吟館、宜畫宜詩、樂在其中。有子曰少琴、能承家學、亦工人物。孫曰琴蓀、另有附載。事略見陳荆鴻編著之藝文叢稿、畫史見廣州市文物志、汪兆鏞編撰之嶺南畫徵略、題畫詩見余少飄編著之廣東歷代詩鈔。

題上街賣藥酒人物圖

舊時管店今己盲、學賣藥酒稱先生。

題三個盲人各操絃管合奏圖

盲之絕技不復作、盲佬多從此老學、而今剩有高佬奇、只會鼓鑼雜絃索。

題盲鬥圖

鬥從何事起、鬥到何時止。人生無百年、光陰迅速耳。何必計輸贏、英雄安足恃。筆底生殺機、呼童焚此紙。

題看雲圖

青山與浮雲、終日淡相守。山爲雲窟宅、雲爲山戶牖。無心成白衣、有意變蒼狗。人情亦如雲、寄語看雲叟。



蘇六朋

蘇武牧羊圖



長春題畫詩

蘇仁山

先生本名長春、別署頗多、曰靜甫、曰夤珊、曰壽莊、曰七祖、曰棲霞、曰菩提、曰再生尊者、皆在其作畫之時信手所署也、鄉籍杏壇。生於清嘉慶十九年甲戌、公元一八一四年、年近四十而歿。生平性行怪僻、似顛非顛。相傳其在滿清統治之下、曾懷一私章刻有漢王孫三字、其父母告誡弗聽、恐受株連惹禍、竟將之送到官衙、受囚禁多年而後釋、因而與家庭脫節、流浪街頭爲生、作畫益奇異百出、有以雞毛畫者、有以香腳畫者、創前無古人、後難聞有嗣響。此一位與世相違畫怪、有時更在畫幅上、題上詩句、有多至百餘字、若仿陶淵明田園體者。事略見陳荆鴻編著之藝文叢稿、畫史見廣州市文物志及汪宗衍編著之廣東書畫徵獻錄、題畫詩見余少颿編著之廣東歷代詩鈔。

題自寫像

蕭蕭枯木、展書往復、日之夕矣、依草以宿。

題山水圖

泉氣涼衣襟、泉聲和誦讀、抱節槃澗中、美人懷空谷。


題詩客泛舟圖

一溪淨春碧、低簷花亂飛。詩客泛舟來、迎風過翠微。松澗掛落日、石硯磨微霏。仙人留古蹤、白羽接柴扉。欲作槃澗想、鳴絃生淒悲。十里山痕綠、百畝深蕨薇。夷齊不耕耘、采采有餘肥。何須仕始祿、洗藥餘刀圭。吁嗟赤松子、偕我以來歸。

題寒泉漱石圖

茆亭臨水樹臨谿、春草蘇蘇偶未齊、最愛寒泉漱奇石、潺湲聲在隔林西。

蘇仁山香脚畫山水軸



宮教集

明參心座學駢體文

馮康侯謹署



宮教集古近體詩

蘇若瑚

先生字器甫、號簡園、鄉籍烏州。生於清咸豐元年、公元一八五一年、卒於公元一九一七年歲丁巳。積世原皆農商、自先生始勛於學、第光緒二年丙子、公元一八七六舉人、充咸安宮教習二年而歸、一度主講廣州教忠學堂經傳書法。嘗從同邑李文田先生游、切磋魏唐碑帖三昧、旁及蒙元歷史地理之學、於書法尤工擘窠大字、爲世所珍。事略見民國己巳縣志選舉表、詩章見先生之宮教集及鄒崖逋者鈔讀之嶺南詩存。

題嘉峪關外唐碑搨本

依山造械振邊風、無復班超在眼中、大石治磨新刻就、高昌壁壘一時空。

又

欲傲燕然別有碑、紀功當在仲秋時、寄言誤讀新書者、石本全非奏凱辭。

又

金石摩挲總入吟、龍蟠雙碣震雷音、瓜沙伊肅來歸日、何補中原半陸沈。

題嘉峪關外漢碑搨本

敦煌太守懾氈庭、姓字何須著汗青、千古穹碑人企羨、欲尋祠址按圖經。

又

萬里陽關壯士心、西行人共說裴岑、李陵題字馬駿石、苔蘚長蘊無客尋。

又

天驕騷動震威難、況復全師慶乂安、恪靖篆銘同不朽、祁連終古頌扶闌。

丙戌新春

迎春小雨膩如酥、笠屐宗人滿路衢、祝我科名惟有笑、片心久已濯冰壺。

是年不赴禮闈

庚子九月初見流連

我聞流連名、未見流連狀、今名榴蓮客言新嘉坡、此果特珍尚。深秋果熟時、萬家剩空巷。攜錢走呼買、濃香盈陌上、宗人自南回、包裹來相餉。棘刺褐而蒼、仿似波羅樣。波羅刺短疏、此刺密以壯、形大如合甌、堅厚耐炎瘴。日久皮綻裂、入座芳早鬯。乘隙雙手擘、白子分房漲。色味已大遜、奇芬卻飄颻。書堂迅傳觀、爭試竟不讓。粵有番荔枝、剖食香浮宕。越南山竹細、函子僅一兩。獨此多大核、蘋婆核同相。氣美既同愛、味腴須留量。晚餘四之一、置之瓶壺傍。晨起香尤烈、撲鼻達腑臟。地氣雖有殊、精華同醞釀、佳名久遠傳、衆言原不妄。忽憶戊戌夏、黎侯來嘉貺。種桐四十年、疏是年木神旺。其旨逾呂宋、餘汁若流醞。拭之輒不盡、三日香猶亢。未若此嘉果、奇觀慰素望。彼固味香兼、遠至不如曩。既幸符所聞、何必兩能償。作詩紀異物、留待畫圖創。

家園即事

晨興增一衣、深颺入深屋。西園納秋爽、東窗延朝旭。喧聲雜蟲雀、亂影饒蕉竹。閑戶靜如山、汲泉清似瀑。默童瀹新茶、稚奴進白粥。一朝免俗氛、俯仰萬事足。才拙志復惰、何暇念世局。世局半烽煙、英流皆愾然。袁安每垂涕、祖生先奮鞭。亦既無官守、胡爲分吏權。稅畝復稅畝、屠捐又屠捐。大團責義會、小衆籌例錢。謂我當稱總、揖人惟避賢。猥援維桑敬、終推曰艾年。無米誰爲巧、覆車良鑑前。恨無五百貫、參道羅浮巔。

病已示塾中諸生

書生羸質六淫多、展轉呻吟喚奈何、久病講茵塵積寸、會當拂拭振絃歌。

又

晨起高齋趁嫩涼、微風開卷墨流香、奇文況可頭風愈、助我囊中篋朮薑。

戊戌四月因有時疫借城西葉氏廢園樓上暫置講帷樓外荔子纍纍滿樹矣一夜狂風大作落去過半樓下別僦居之工人乘機攫取嘆風景大減與諸生賦以惜之

登臺早約戒瓜田、點綴荒園喜燦然、不料青青如棗大、傾筐攜取快爭先。

又

昔我詩稱不望丹、初丹偏見一林殘、頓令口眼都無福、餘顆孤懸且細看。

癸丑移居花塢自號良廬漫賦

季男狂草已成章、幼學孫兒筆硯良、懸臂楷行隨意運、清貧如我也何妨。

又

漢碑閱盡兼劉宋、自喜殘年眼福饒、更得盃壺供賞玩、小罇佳茗度寒宵。

和凌孟徵孝廉新居次原韻

昔年攜手上層崖、山氣欣逢日夕佳。投滿奚囊同檢料、索來僧鉢學安排。喬松若在終當遇、嵩華雖高漸可階。蔣徑頓荒遊興淡、羅浮歸後但酸懷。

花田行

散步城南南、買舟渡平川。登岸行行去、種花花滿田。問之種花人、誰爲宮人阡。彼云在城西、兩地當判然。我曹花爲業、世世復年年。配茶發奇香、價倍清明天。橐載且萬里、盈車滿商船。爾來茶稅重、島國耕耘便。茶市與花市、低昂自相連。昔日種花戶、農夫稱神仙。今時花利薄、秋饑冬無綿。反羨遠服箱、捆載金珠旋。我聞長太息、鄉閭輕棄捐。安能繫離心、長繩相絆牽。豈惟花田人、君觀九市廛。

題畫鸞

鳳凰吾弟鸞吾兄、寫得形神便有聲、乍譜咸池阿閣上、幾多春鳥下風鳴。

石洗池分鏡

畫堂二兄大人教

花生葵看瓶

弟蘇若瑚

蘇若瑚

魏楷五言聯

冬心室詩存

蘇寶盃

先生字幼宰、號冬心、鄉籍烏洲、若瑚公哲嗣。生於光緒七年、公元一八八一年、卒於公元一九三八年、以卒於滬寓、葬於滬西廣肇山莊。先生幼承家學、舉光緒三十二年優貢、官歷禮部主客司主事、鼎革後以居滬講學終其身、平生書法擅漢隸唐碑、遺著有冬心室學駢體文、以世事遷移、至公元一九八零年、先生之哲嗣文擢教授始檢得於叢殘之中、得與宮教集合輯成冊刊行傳世、事略記此、詩一首見南海余少飄編之廣東歷代詩鈔卷八。

聊社詩鐘集題詞并序

懿夫信誓居笠、宜臭味之同符。調暢襟靈、惟文章爲至樂。嚶鳴之義、無替前經。聯吟之事、粵稽曩哲。孟韓城南之作、皮陸松陵之編、雅韻所傳、夔乎尚己。海上之有聊社也、吳歛越吟之地、最觸羈愁。潘江陸海之倫、素饒儷藻。爰以休沐之餘晷、用試聯句之別裁、名曰詩鐘、風由晚近、義同文會、人並勝流。方其折柬傳箋、命儔嘯侶、追隨飛蓋、跌宕文席。載酒盈樽、似論文於渭北。刻燭一寸、效鬥韻於竟陵。格備乎雁足鳶肩、例嚴乎兔園獺際、匠心獨運、斲卉刻葩、才語抽秘、紛紅駭綠。多而益辨、小胥腕脫於傳鈔。中或疊雙、猛士心雄於見獵。此則即席之勝概也。然而隻雞之招、拘於近局、執鬪之雅、限於故知。雖饒弄翰之歡、終隘題襟之量。用是交呂攀嵇而懇款、結符友李而殷拳。合江南淮北以廣拓藝苑之疆、泯王後盧前而並作騷壇之侶。每拈題於匝月、用角勝於七言。撐霆裂月之才、範水模山之思。爭標新於子墨、期遞速於庚郵。洛水鐘鳴、隔千里而應響。桂林鼓震、合二郡而齊聲。錢颯詩筒、和仲爲之心折。張先詞句、選郎於焉神賞。此又傳題之逸致也。寶盃學疏炬照、識局咫聞。既無芙蓉初發之才華、更乏葫蘆一擲之敏給。珠堪記事、難逢殊寶於燕公。几可備忘、未獲靈檀於謝子。徒以東里之贈紵、竟容南郭之濫竽。縱或劫半日之肝脾、攫古人



之鱗爪。不出筐篋之瑣語、何當詞翰之雅裁。引聽金徽、懷慚筵弄矣。趙君蘭石、以斯社創設。綿歷四年之光晷、契合千里之神交。玉屑紛霏、墨花燦灑。是雖雕蟲之小技、亦徵繡虎之餘才。趙渭南長笛一聲、遂擅倚樓之譽。李昌谷錦囊零句、都爲嘔心之詞。詎宜霧黯豹斑、煙霾蟠采。因師西崑酬唱之意、酌東陽聯句之規。錄其前茅、付諸活版。近者、南皮張尚書、吾鄉蔡觀察、戟寢蕭暇、豪翰颯馳。京華之寒山、人懷荆璞。閩海之燈社、帙富隋寶。茲之所刊、匪欲附庸風雅、聊以留誌泥鴻耳。抑余重有感焉、溯斯社之朔、實戊辰之年、許君奏雲、梁君相樹、甘君璧生、葉君海屋、爰始爰謀、有倫有脊。余與四君、或爲累世之交、或屬齊年之誼、等通家之孔李、慕耐久之魏裴。海屋於余、尤稱鍼芥、每當集會之期、輒共扶將而往、乃未及一稔、遽隔重泉。余以范車之痛、重牙絃之感、欲焚筆硯、久息旗鼓、敗興非由於催租、愴懷有同於輟杵。無何而璧生又攫消渴、旋痛僚幽。他如岑君侶陶、包君懺餘、並忽颯塵、永歸厚夜、四更歲籥、幾痛人琴。向秀之於嵇康、神傷鄰笛、魏帝之於應瑒、淚灑遺文、吁其悲己。蘭石是舉、既足慰慕徒之戀復以抒感舊之懷、懿此一編、具茲兩美、適弁端之見委、雖著糞其奚辭、勝集靡常、更欲墜歡之重拾、申詠無斁、彌覺眞賞之在襟、辛未嘉平月順德蘇寶盃序。

聊社詩鐘集詩

客中簪盃足清娛、冠服何嫌笑我儒。鄉思共評餐荔譜、叢談細校點茶圖。未能遼海成孤隱、且學高陽號酒徒。放曠長甘鏹光采、旁觀休更喻華爐。

按余少飄注、社友除師少飄爲寶盃及門弟子外、有順德梁慶榴伯翰、彭緯文健東、梁永思彥田、番禺趙元澧蘭石、金保權子才、葉蔚英海屋、許炳璈奏雲、東莞祁正武垣、高要區士奎子彝、中山楊玉銜鐵夫、甘啓元璧生、新會梁琮璧選、吳川林嵩尊嶽威。

玉衡十二元大人正

翰墨已齊鍾大理

轂名恒鑿範叅軍

第蘇寶盃

蘇寶盃

楷書七言聯

省齋遺稿

蘇昭南

先生號省齋、鄉籍待考、清代諸生、見溫汝能纂輯之粵東詩海卷九十四。

秋夜遠懷

鳥倦歸故巢、寂爾群動息。獨坐百感生、秋聲何太逼。木葉脫疏林、寒燈映四壁。砧杵村外聞、蒹葭露重滴。伊人水之湄、道左嗟離索。涼風吹我襟、庭中孤月白。

祝君禮梁姊丈七十

家聲傳古道、一見即心傾。不作寒暄態、而深骨肉情。天懷原自得、世事漫相驚。我亦盈霜鬢、殷勤酌兕觥。

和敬門二弟生朝原韻

五十虛過敢抗顏、故園猶自對青山。經營世事心如昨、潦倒風塵鬢易斑。將母共憂爲日短、種花深羨得身閒。人生適志須行樂、春草池塘任往還。

小除夕途中寄內

關河迢遞思茫茫、感泣牛衣尚未忘。敢負英雄多氣短、只憐兒女最情長。一年將盡催霜鬢、十載無成思故鄉。更恐倚閨人悵念、爲余珍重慰高堂。

南翁詩稿

蘇夢麟

先生字偉南、一字韓岳、鄉籍待考。清代布衣。見溫汝能纂輯之粵東詩海卷九十四。

臨春閣

繁華空羨帝王家、高閣遙看事可嗟。椒麝氣消塵土寂、沉檀香散棟梁斜。望仙西苑流殘月、結綺東窗噪晚鴉。此日臨春春已老、不堪重說後庭花。

相以居集

蘇士許

先生字未人、鄉籍碧江、清代諸生、家貧力學、工書法、善詩畫、著有相以居集。見溫汝能纂輯之粵東詩海卷六十。

城南感懷

相逢素馨市、買醉荔枝磯。人並紫騮去、月隨青雀歸。歌聲空夜幌、花氣豔朝衣。惆悵當年事、今來故故飛。

人日梁敦儒過訪

一春纔七日、輒已半晴陰。冰雪仍餘臘、鶯花卻早春。盤蔬此日話、江水詰朝津。且醉杯中酒、看君南北人。

客中歲暮詢胡顯孩

樹樹梅花逼歲除、年年江上未安居。窮途只見青山在、往事全銷白髮初。喜仗故人頻有信、羞彈長鋏久無魚。袖中新句難爲報、密極心懷轉似疏。

俟園詩鈔

蘇逢聖

先生字琴蓀、鄉籍南水、乃蘇六朋之孫。清光緒十四年戊子、公元一八八八年舉人、性倜儻、好讀異書、嗜酒工詩、得天才放逸之譽、著有俟園詩鈔、者香書屋遺詩。列傳見民國己巳縣志、詩章見鄒崖逋者鈔讀之嶺南詩存。

傷春曲

春風未老春葉乾、笙簫寂寂樓臺寒、美人無言倚闌立、自將影照青溪看。

友石山房詩集

蘇應庚

先生字西垣、己巳版縣志載「里居缺」、咸豐乙卯舉人。工畫梅、嘗館於鳳城碧鑑龍氏小柴桑園、中多梅樹、花開日輒題以詩、著有友石山房詩集。見南海余少飄編之廣東歷代詩鈔卷四。

自題畫梅

生綃百幅瘦還腴、不有徐熙恐負渠、幾筆橫斜臥遊慰、黃昏月裏定生虛。

又

活筆繪香清繪畫、長條欲壓短條攢、滿林雪意摧何急、洩得春光出手寒。

又

興酣潑墨雪花飛、冷氣侵人任意揮、轉盼香生春爛漫、水中鏡裏想依稀。

北遊草

高士釗

先生字西山、鄉籍馬潛、清乾隆壬子、公元一七九二年舉人。授徒省門、風致豪舉、一時門下多出科名。性至孝、脩脯收入、必獻其父、復友愛、與六弟同居、終身齊飲食、從不析箸。平生以治古文、精筆力稱、因當時多處碑版、皆出其手。論者謂其能伯仲相提、名士如謝庶常澧浦、劉編修樸石、足以並主壇坫、而先生之妙筆、更主峻潔云云。遺著有詩文集、紫藤花館試帖、北遊草等。列傳見咸豐縣志國朝一、詩章見番禺凌揚藻評輯之嶺海詩鈔卷十四。

澄懷園篋坡先生直廬即目

山清水碧遶朱檐、綺檻花欹砌草纖。傍午輕陰移小樹、新秋涼思入疏簾。地饒泉石心偏遠、人到蓬壺夢亦恬。千載邵憐江海客、天香衣上一痕添。

順德仇池石輯

大賚堂藏板

羊城古鈔

先生字匯洲、號竹嶼、又號巨川、鄉籍勒竹、清乾隆嘉慶間布衣、性瀟灑、能文章、嘗館於同邑溫汝能家、合輯鄉志、及爲羊城古鈔八卷、能傳述先世事功、網羅地方文獻之散失以流諸百世、而獨不及一舉成名、其亦命歟運歟、抑先生之志不在此歟。列傳見咸豐縣志、勒竹齋詩見鄒崖逋者鈔讀之嶺南詩存。羊城古鈔是先生成於嘉慶十一年丙寅、公元一八零六年、至公元一九八一年、邑人潘小磐合文友陳荆鴻等九十七人醵資重刊於香江。

羊城古鈔自序

天下爲耆古好奇之士、恒多舍近而圖遠、厭小而務大、六合之遙、四海之富、苟有殘山賸水、漏義遺文、頗堪傳述者、莫不旁搜遠博、罄其藏而始快。以故十洲三島、三都兩京諸勝、掩卷遐思、恍如目覩、無他情之專也。及語以本國遺徵、故鄉軼事、反不能無習而不察語焉、不詳之處、是何易其所難、而難其所易耶、所謂貴耳而賤目者耶。帝堯之歌曰、不蹟於山而蹟於垤。人之常情類然也。不佞、粵人也、輒不自量、竊欲效司馬子長遍覽天下之山水、發我性靈、誠大快事、顧有志未逮、亦惟是生於粵、長於粵、南人操南音、雖不忘本、不已陋乎、吾知淹博通儒、必有以井蛙貽譏者。雖然、吾聞之、平地爲山、先覆一簣、寸雲觸石、遞遍九垓、所積者漸也。彼六合之遙、四海之富、安知不自父母之邦始識之乎。且以吾粵而論、南交地宅、半壁天開、移鄒魯於海濱、聚仙靈於窟宅、其地其人、固多足紀、又況省會之區、尤爲領袖百粵、冠冕炎洲者也。自漢以還、山川之淑氣常凝、文獻之流風可接。詩曰、惟桑與梓、必恭敬止。桑梓且然、況山川文獻之大歟。閒常登玉山、步層樓、南望尉佗城、靈洲注其西、扶胥繞其東、其中偏霸業、沈衣冠、盛氣遐蹤、往跡皆在是焉。低徊者久之、而懷古之情頓深矣、興到狂吟、往往而有、爰搜三城之名勝、檢入詩題、覽千古之芳蹤

徵爲典故、登臨偶記、無非稗史傳聞、取次不倫、未免吟壇見哂、第提裘而先擷、領將十郡自可徐參、循此濫觴、則十洲三島、三都兩京、無不神遊其盛、何有於殘山賸水遺文漏義、而不拓捨其餘哉。若然、則謂羊城爲覽勝之發軔、而古鈔乃淹雅之權輿也可。竹嶼仇巨川匯洲氏自序。

題希夷先生癡睡圖

此公心只與天遊、形影何須問醒不。呼吸但能通造化、晦明端不限春秋。百年瞬息誰先覺、五代干戈此獨休。無夢漫隨勞蝶化、蓬蓬翻得笑莊周。

隴蜀道中以下共五首見粵東詩海卷九十

海棠花暗酒壚邊、一路猿啼思悄然。日落夔城連白帝、雲迷棧道在青天。上皇死後悲鸚鵡、望帝歸來化杜鵑。欲訪少陵吟眺跡、古今秋興共堪憐。

寄故園諸同輩

千里依人事遠遊、間關容易老時秋。山川愛客留青眼、風雪依人被白頭。古調琴歌時自聽、故園詩酒憶賡酬。珠江舊有閒風月、願借漁竿侶海鷗。

探梅

鴻濛十里凍雲遮、一路寒衝興轉奢。藤杖冷支捫嶺雪、板橋香度隔溪花。籬邊犬吠山村古、竹外人穿石徑斜。自向羅浮問消息、無窮春思在天涯。

縑絲詞

一寸柔腸萬縷思、分明情緒似縑絲。絲長絲短有時盡、別有纏綿無盡時。

光孝寺菩提樹

訶林訶子已成塵、獨有菩提不壞身。悟得心空即無樹、故經千劫亦長春。



府群玉嘯園詩稿

余象斗

先生字公輔、又字齊樞、鄉籍馬岡。清順治辛丑、公元一六六一年進士、授觀政刑部。以母老告歸。性冲和、好遊覽、八十猶好客、相與賦詩、令子孫和之爲樂、著有詩林正宗、韻林正宗、府群玉嘯園詩稿。列傳見咸豐縣志、詩章見溫汝能纂輯之粵東詩海卷六十二

憂旱

梧桐一葉墜、大火已西流。農人終歲勤、稼穡望有秋。昊天不降雨、中谷嘆其修。高原咸失潤、下隰罕成疇。九州定貢賦、桔槔何以謀。焚巫與焚尪、魯公德不周。成湯六事責、宣王側席憂。豈是玉食計、直爲蒼生愁。

宿黃沙坑

晚向荒村宿、邊門皆草萊。傍山無海物、近市有春醅。舊路殘碑碣、古祠生蘚苔。兒童皆愛客、相視共徘徊。

初秋送鄭珠江太史還朝

湛露初零粵海濱、桂林誰許作閒身。十年將母成全孝、萬里還朝見盡臣。月色漸沉金殿曉、寒威將散玉堂春。遙知北闕瞻天後、定有新詩寄所親。

水源木本稿

余映斗

先生字劍君、鄉籍馬岡、象斗之弟。見溫汝能纂輯之粵東詩海卷六十二。

清明日旅中感懷

清明五載不能歸、欲渡圻垠無羽翼。故土荒墳斷海濱、水源木本摧胸臆。聖朝恩重撤邊防、遊子春深仍旅食。塚上相逢酌酒人、心中自覺覩顏色。登臺遙睇壘頭雲、淚染他鄉芳草碧。

答林墓有年兄

烏衣門巷盡輕裘、十畝園亭水漫流。酌酒花前憐阮籍、論文林下識何休。雲歸古寺鐘初寂、雨過垂楊煙自留。醉與春鶯新睡足、詩篇敲月落城頭。

圭峰春望

圭峰煙雨鎖橋西、踏遍東風芳草萎。雲繞匡門隨意去、鳥歸壇畔傍人啼。舊鄉一路天連水、荒徑三春燕掠泥。且盡吟鞭數杯酒、夕陽斜照晚山低。

望匡門

匡門一望草芊芊、故壘孤陵共可憐。百戰山河依海國、一朝王氣散樓船。夕陽華表無歸鶴、荒殿春深有杜鵑。回首不堪傷往事、至今波浪撼長天。

語山堂詩

余錫純

先生字允文、號兼五、鄉籍馬岡。父象斗、清順治十八年辛丑、公元一六六一年進士。錫純少慧、以歲貢出任陽江訓導、雍正年間與修直省通志、一統志、清遠縣志、皆詳簡有法、年九十三能書繩頭小楷、卒年九十有五。遺著有語山堂詩文集。子于鵠、雍正七年己酉公元一七二九舉人、以三世並享科名、得福人之譽。列傳見咸豐縣志、詩章見鄒崖逋者鈔讀之嶺南詩存。又見番禺凌揚藻評輯之嶺海詩鈔卷五。

秋琴

流水一何動、孤琴心自閒。清高出素手、秋色滿寒山。獨向月明際、悠然太古間。無人知此意、長嘯倚柴關。

中山懷羅司勳

深冬頻醉洞中天、望斷梅花憶曩賢。廷杖餘生存諫草、衣冠遺塚沒荒煙。江山不謝投林客、日月長留未死年。原子有書誰爲獻、一回回首一潸然。

輓父執炎州薛明經

床頭周易已封塵、書滿名山墨尚新。潘岳老來無父輩、陶潛過後少遺民。三春夜斷歸鄉夢、一代文爭異國人。怪得世間無可語、九泉知己盡交親。

舟泛甘竹灘

荷花蒲葉點波明、上下漁舟入水輕。帆勢欲斜知纜轉、灘聲忽細覺潮平。逢僧易感居山願、傍岸難忘坐釣情。但得秋風鱸膾好、不將塵土較枯榮。

寄吳山帶

吾愛金茅子、蕭疏獨任真。高風無此日、將老見斯人。遇物能傳影、開花不待春。詩成應寄我、藏此當家珍。

先慈大祥日

獨立空堂正悄然、衣裳燒盡只殘煙。嘉蔬臘酒分明在、不得承歡已二年。

柱史閣初集

余雲祚

先生字善將、鄉籍馬岡、象斗之姪、清康熙庚戌、公元一六七零年進士、官歷湖廣藍山知縣、著有柱史閣初集。見咸豐縣志、詩章見溫汝能纂輯之粵東詩海卷六十六。

燕臺

居庸關外草芊芊、薊北風橫萬里煙。易水西隨巴蜀去、冀州南與豫徐連。千金市骨誰甘後、一匕環秦爾獨先。聞道幽燕多俠客、風流曾否似當年。

咸陽

葉滿宮池草滿墳、當年不識漢家軍。函關未破全嬴沒、坑火方燃二世焚。塞外野猿哀白骨、沙邱走鹿傍黃雲。老人圯上三更授、應笑秦王尚好文。

閨怨存稿

余五娘

夫人鄉籍待考、鍾希玉繼室、見溫汝能纂輯之粵東詩海卷九十六。

寄外

孤劍天涯客、清霜嶺外秋。好將楊子賦、莫作杜陵愁。地遠書憑雁、江寒月近舟。西風多感興、知上仲宣樓。

夜坐有作

夜久燈暫息、起坐披衣裳、樓高近明月、軒靜納微涼。促織街前響、芙蓉水面香、悠然樂清景、塵慮迥相忘。

惜春

惜春無計爲春留、縱有黃金是拙謀。歸雁已隨雲北去、落花空付水東流。窗開白晝鶯聲碎、簾捲黃昏燕語愁。此夕不須倍惆悵、明年花發又登樓。

題蘇武牧羊

風嚴朔北雪漫天、漢節飄零十九年、白首歸來城郭在、茂陵松柏化蒼煙。

長門怨

寶鴨香消夜氣清、長門燈暗夢難成、窗前細雨腮邊淚、點點聲聲滴到明。

如蘭吟草

余大姑

大姑鄉籍待考、清代才女子、見溫汝能纂輯之粵東詩海卷九十七。

九眼橋

路窮隨處水潺潺、勢擁飛虹跨海關。五嶺歷平南土地、九門長鎖漢江山。濤聲尚壯陰風裏、戰氣常流白晝間、懷古獨登臺上望、村煙連接野雲間。

先生字于吼、號古邨。鄉籍古朗。清康熙十五年丙辰、公元一六七六年舉博學鴻詞科。常與陳恭尹、梁麟生、羅天尺等友善、時相唱和。授書將軍署時、當時大吏多遣其子弟從之游者、遺著有水原集乙卷。列傳見咸豐縣志、詩章見鄒崖逋者鈔讀之嶺南詩存。

鷓鴣

嘖嘖復嘖嘖、鷓鴣不得食。人言鷓鴣苦、鷓鴣翻自適。照水氣豪雄、矯首訴胸臆。我受主人恩、當報主人力。入水所不辭、求魚安足惜。啣魚售價高、我亦沾餘瀝。若復恣饕餮、難免主人斥。

送吳十一茂才赴某相國幕

十年高臥老滄洲、二月鶯花趁遠遊。下士無如今宰相、辟書原自古諸侯。借爲雷雨生天下、著就文章入鳳樓。徵調日嚴羈不得、一函秋水倚吳鉤。

小鄭詩稿

陳同

先生字鎮常、號小鄭、鄉籍龍江。清道光六年丙戌、公元一八二六年登進士、選任知縣。惟性簡傲、微有古狂士之態、豪放之氣、故輕於仕途、情寄吟詠、終日苦思冥索、得東野玉川之神髓云。列傳見咸豐縣志、詩章見鄒崖逋者鈔讀之嶺南詩存。

晚泊

莫問山程更水程、疏篷晚泊露花明。雲含宿雨星生暈、風泊秋潮月有聲。吟罷茶煙寒午夜、夢回人影兀孤檠。圖南旅雁飛鳴急、惹得鄉愁一夕生。

獨漉家聲

陳 贛

先生字端木、鄉籍龍山小埔、恭尹子、清初諸生。事略與詩見一九三五年乙亥溫肅輯錄之龍山詩錄卷上。

秋園次家大人韻

池水當清淺、秋來過雨添。新涼歸短袷、疏月澈重簾。哀雁因風亂、飛花著露黏、誰爲握粟卜、糊口待窮檐

吾家無舊物、傳世有遺經。日月期將旦、奎婁仰聚星。白虹侵赤暈、紫土拭青萍。化碧千雲氣、高飛入渺冥。

陶令懷三徑、孫公賦遂初。多慚孤竹宅、猶稱野人居。近市偏知屨、臨淵豈羨魚。秋畦沾雨潤、負插采嘉蔬。

東軒草詩

陳 勵

先生字士皆、鄉籍龍山小埔、恭尹子、詩有家學而獨成面目、著有東軒草傳世、清康熙己卯、公元一六九九年舉人。事略見咸豐縣志、詩章見乙亥溫肅輯錄之龍山詩錄卷上。

進帆峽口

雨歇草更青、霜颿起江樹。層雲東北飄、漸漸日光露。西流如激箭、行舟邈難渡。夢裏掛輕帆、忽及峽中路。峭壁入蒼穹、洪濤怒奔注。遠近非一形、戲嵌似無附。山川自終古、一葉旣以去。倚棹作長吟、領此萬古趣。

九日登鎮海樓

飛樓重得壯南藩、下瞰群峰控北門。江海遶闌天勢盡、谿山如掌霸圖存。休嗟絳葉飄黃瓦、且采籬花佐綠樽。千古功名餘片石、爲誰搔首問乾坤。

介亭詩鈔

陳世和

先生字聖取、又字時一、鄉籍龍山小埔、勵子。清雍正癸卯、公元一七二三年拔貢、官歷龍游縣丞。家所藏書、遍誦不忘、詩歌綽有祖風、遺著有介亭詩鈔。事略見咸豐縣志、詩章見一九三五年乙亥溫肅輯錄之龍山詩錄卷上。

門舊僕黃引南落魄京邸因感成詩

家運丁陽九、艱虞汝共持。金閨楓落日、珠海麥秋時。飄逐將何往、歸飛未有期。不才深愧汝、貧賤立名遲。

西樵歌

三十二村村一峰、峰峰青削玉芙蓉、歌聲唱出採茶女、幽澗杜鵑相映紅。

新婦詞

十一學織素、十二學彈琴、十三學吟詩、問郎知不知。出門拜父母、入門拜舅姑、舅姑父母心、誰是郎知音。人言小姑巧、珠玉生警歎、夜雨海棠足、猶未識春態。

游俠詞

丈夫不擊劍、虛此七尺軀。丈夫不飲酒、古人笑我愚。金鞍駿馬來燕趙、酒熟封侯正年少。不學漢淮陰、狐疑還棄市。不學梁王越、哀憐乞井里。男兒得失會有天、何必野狐悲兔死。瑪瑙紅枕白玉床。琥珀光濃寶鼎香。金鞭拋下入蘭房。佳人一見贈明璫。十指纖纖春筍長。手持絃管樂未央。玉門關上烽火光。腰懸秋水綠沈槍。身騎赤馬忘羈韁。長驅直過西受降。不知天地數重霜。健兒齊到進衣裳。

詠竹

疏植何曾惡、高齋夏亦宜。豪狂時縱酒、幽獨坐題詩。文鳳饑從集、佳人

淚或移。江南無盡竹、憑唱一枝枝。

三瀧詩選

陳華封

先生字祝三、號復齋、亦恭尹孫、南敬之子、居羊城、豪俊不羈、少隨世和學舉子業、不第、以詩學世其家風、築晚成堂與邑郡名流分曹結社、遺著有復齋詩鈔、三瀧詩選、事略見咸豐縣志、詩章見一九三五年乙亥溫肅輯錄之龍山詩錄卷上。

齋中有石狀如佛手先世所遺也諸公以詩見贈賦此答之用東坡先生醉石道士韻

吾家一奇石、厥狀如佛手。色相本天然、人事無矯揉。憶昔我祖時、珍之若瓊玖。海內集名流、談元探淵藪。補天雖未能、拈花曾點首。無何歲龍蛇、家運丁陽九。孤掌自難鳴、未免罹塵垢。苔蘚侵其膚、藤蘿掣其肘。頽然此一拳、吁嗟悲世守。何期來群公、摩挲爲良久。顧盼日垂青、訂交呼作友。薰之功德香、沃之甘露酒。一指悟因緣、三生證無有。揮毫爲賦詩、腕下煙雲走。從來經品題、石與人俱壽。

春日與杭太史何西池集寶莊嚴寺詠杜鵑花

杜鵑啼處春深淺、東風香積冷然善。空門旣已絕鉛華、誰人歎把紅綃剪。千朵萬朵貼枝頭、雨濕胭脂猩血流。可是僧家無俗禁、寒食之火慣不收。沙彌指向波利樹、盞盞佛燈紅似鑄。個中三昧可曾消、我到問花花不語。花兮花兮來何從、僧云移向羅浮峰。羅浮天台各異種、鶴林寺內將無同。乃知此花難變質、若過花時開不得。禪宗道教本來殊、九日莫逢殷七七。

清明與高于天謁先曾祖忠愍公墓

貞操屹立與山尊、寒食東風感獨存。得薦羊羔憑好友、未繩祖武愧曾孫。一坏空葬孤臣骨、千古難招帝子魂。悽愴不堪思往事、蒼苔殘蝕墓旁門。

夏夜雨霽李信芳羅麗朋梁澧隅梁麗承過訪晚成堂分賦

久雨經旬坐擁書、小晴今夕快何如。濕雲乍散開三徑、群屐相過共一廬。未易忘形惟老少、



最難行樂此居諸。興酣更剪西窗燭、入眼新詩獨起予。

### 唱隨詩稿

陳吳氏

吳氏乃陳公華封配室、名門才女。詩二章、見溫汝能纂輯之粵東詩海卷九十七。

#### 擬袁女留別孫刺史兼呈峽山和尚

妾家後洞洽飛仙、翡翠林中思杳然。宦海初迷脂粉劫、愛河終悟雨花禪。玉環已訂塵心解、金鎖猶全道骨堅。欲向佛燈求一懺、山雲溪月自年年。

#### 題畫柳燕

海國會歸故壘家、暮春深院綠陰遮。堂前大雅高懸想、不必揮毫寫落花。

### 小禹詩草

陳次蕃

先生名舉甫、華封之子、岩野先生之玄孫也、有乃父之風、洒脫自喜、甫成童、即能擘箋分賦、著有小禹詩草。事略見咸豐縣志、詩章見乙亥溫肅輯錄之龍山詩錄卷上。

#### 夏日讀書

不讀詩書負氣豪、十年心跡枉牢騷。風花世上非今日、人鬼關頭此一遭。曲徑綠深生竹筍、短牆紅爛熟櫻桃。閉門悟得閒中趣、一卷窗前日未高。

#### 夜起

寶劍何當問世情、欲原心事苦難明。科頭未減狂奴態、擁鼻曾多老婢聲。身併繭蠶絲易縛、夢同巢鶴露空驚。不禁五夜回腸斷、鑄鐵無端錯已成。

#### 秋日同張著吉姊丈過甘谷亭世伯觀汪鹿岡先生畫松

秋衫新試爽初乘、訪舊山川興不勝。粉壁尚存名士跡、衡門寧碍野人登。虬枝不改森千尺、澹墨如過薄一層。三十年來高格在、幾回心折剡溪藤。

與政同聲

陳應魁

先生字挺夫、一字鰲麓、鄉籍龍山小陳涌、少孤、受學於母、竟以成才、登乾隆己卯、一七五九年舉人、官歷四川省鄰水縣知縣、以勤政周巡縣境見聞、嘗因甘李二巨族相械鬥、輒上下行賄買凶抵罪、先生卒能以公正廉明、悉置諸法。及以疾告歸里時、士民多依依不舍云。事略見咸豐縣志、詩見一九三五年乙亥溫肅輯錄之龍山詩錄。

過劍閣

魚鳧獨闢幾紆迴、全蜀咽喉亦壯哉。石自天分雙劍落、山從地轉一門開。悠悠落日金牛路、漠漠歸雲玉女臺。盛世關河無險阻、祇應懷古一徘徊。

樊河橋過蕭相國追淮陰侯處

樊河橋畔水潺湲、載訪遺蹤日欲曛。龍虎儘教隨赤帝、關河寧合走王孫。漢廷躡足原多忌、衛士陳機尚感恩。怪殺蕭郎負知己、可曾鐘室一招魂。

過馬嵬坡

生生世世誓皆空、御輦西行倉卒中。長樂歌殘香粉罷、范陽風急羽書同。六軍似虎謹頭綠、一命如花委落紅。紂妲幽褒成底事、三郎終覺是英雄。

函谷關

子子西行日欲曛、雄關特峙勢干雲。二陵風雨當空見、六國山河指顧分。紫氣何年過李耳、雞聲中夜走田文。怪來百二誇天險、困盡當時虎豹群。

漢中懷古

漢江東去水漫漫、天漢樓前眼界寬。兩蜀山川形勢合、三秦關塞畫圖看。行人絡繹連雲棧、落日荒涼拜將壇。最是炎劉終始地、一回登眺一憑闌。

先生字曉芸、光緒甲午舉人、按民國己巳縣志爲葛岸教德人、官廣西省遷江縣知縣、公元一九零三年應旅美三邑總會館之聘出任主席、三年任滿、本擬歸國、適時當公元一九零六年四月十八日三藩市發生大地震、繼而大火成災、連燒數日、全華埠盡成灰燼、先生率領同寅、致力安撫災僑、整頓善後工作、及賑務就緒、哀鴻有託、先生始安心買棹言旋、回國後仍服官廣西、惟對館務及撫僑工作、仍常致書慰問、關心邑僑。退休後以吟詠自娛終其天年。事略與詩章、見旅美三邑總會館（一八五零至一九七四年）簡史。

讀群賢白沙釣臺諸作有感

姜公八十遇周文、上釣釣國佐大勳。淮陰城下垂綸者、登壇拜將驚一軍。大澤中有羊裘客、漱石枕流志不群。千古遺跡乾坤內、後人誰媿此數君。明儒韜略推文成、旣勤講學亦勤政。白沙真儒相頡頏、名動中朝詔徵聘。惜無渭濱非常遇、國士終難秉國柄。江門水似富春江、一竿鯿鯿聽天命、淵深理學靜中探、鳶飛魚躍見心性。當時釣竊名位徒、竭澤而漁利是圖。陽鱉不知貪餌死、台榭崇侈爲淵驅。遂令鯨鯢掀大波、滄海橫流可奈何。裂網毀網縱巨壑、誰作中流砥柱之孟軻。余度八十二春秋、滄桑幾閱人間世、景仰宗風道未墜、諸賢論定奚須贅。吁嗟、大明江山今已矣、猶見斯臺不朽煙波裏。

附註

編者按旅美三邑總會館簡史編目第五十五頁所載、該會館乃聯合南海番禺順德僑士在三藩市、於一八五零年創立、地址初在企李街與跑華街交界、後遷今日之現址華埠都板街八百三十一至八百四十三號。當年名下有各地三邑會館十一個、各地善堂與同鄉會九個。陳祥和先生爲該會館第二十四屆主席。

味香詩稿

陳滉

先生字野逸、一字苧村、鄉籍龍山大陳涌、清代監生、著有味香詩稿、事略與詩、見乙亥溫肅輯錄之龍山詩錄卷下。

斷腸吟悼女湘雲

孟秋歲壬午、初二酉刻初。門衰命更蹇、嬌女遭暑屠。鬼伯何不仁、奪我掌上珠。去秋汝妹殤、我已色不愉。今春二月間、重喪汝之姑。姊弟無幾人、汝爺又少孤。同胞僅伯存、復遭貧病餘。生汝雖非男、聊慰目前娛。嗜好酷肖爺、不擇酸鹹粗。爺行覓履易、爺歸茗爭餘。縱未辨絃聲、已解歌伊吾。鄰人欠升斗、挈榼能索逋。祖母顧汝笑、謂汝骨格殊。他年適人家、未必輕錙銖。盈盈方五齡、豈知遽棄余。從今數出入、莫望聞爺呼。汝母汝祖母、視汝珍貝如。一宵舍之去、哭泣血淚枯。青燈暗如豆、席門瓜蔓疏。涼風吹稠桑、格格啼饑鳥。歛汝以薄棺、覆汝以朱襦。厚葬古所戒、乃父況寒儒。迢遙燕子山、松柏深且紆。曾祖祖父叔、纍纍邱墓俱。送汝葬其間、不憂梨粟無。先人若有問、再拜候起居。道爺非昔同、兄弟多艱虞。落拓久風塵、性又拙而迂。鼠牙雀角後、家無擔石儲。讀書知不成、爲商乏金珠。因循歷二紀、勞勞仍守株。囑竟淚如泉、仰天幾長吁。修短信有數、死生良非虛。情鍾但我輩、哀來自歔歔。未能學太上、諒遭達者揄。愁爲斷腸吟、用當遣嫁書。

自感二首

欲割情難割、傷心觸景時、閉門偷下淚、爲恐老親知。

縱酒強忘情、花前獨自傾、醉歸慵脫襪、淒絕誤呼名。

即目

簾前雙燕語呢喃、庭院陰陰日半銜、偶向小桃花下立、落紅如雨點春衫。

晚香堂詩稿

陳大興

先生字起然、號耄年、鄉籍龍山小陳涌、清代布衣、著有晚香堂詩稿。見龍山詩錄卷下。

秋杪集片石山房賞菊

菊殘人尚戀龍山、騷客耽吟去復還。拜石米顛曾叩首、餐英陶令尚酡顏、詩情肯任三秋老、花樣聊評半日閒。遲暮不愁空寂寞、白衣攜酒到籬間。

返棹邕江接家書知斷絃而作

花落東風最好憐、邕江停棹接魚箋。香埋帳底無三月、客作天南有兩年。錦瑟乍驚絃已斷、粧臺休擬鏡重圓。杜鵑叫破離人夢、多恐門閭眼望穿。

廣業精舍詩鈔

陳濟時

先生字復深、鄉籍龍山小陳涌、清代授開州學正、著有廣業精舍詩鈔。見龍山詩錄卷下。

曲水流觴

池曲流觴好、剛來童冠群。瀑飛花帶雨、杯轉水生紋。解襖懷孫綽、留題憶右軍。樵西幽勝處、一醉共眠雲。

蘭桂堂詩稿

陳佑成

先生字韶階、鄉籍龍山小陳涌、清代布衣、著有蘭桂堂詩稿。見溫肅輯錄之龍山詩錄卷下

爛傘

客途撐蓋雨風寒、顧影飄零入世難、但得挾持真有具、不妨破格與人看。

野性

野性那知與世諧、一肱橫枕便生涯。品無俗厭非真潔、詩有人憎始當佳。宣撫花經苔共雪。平章樂府蚓兼蛙。年來風味渾何似、笑比山僧只欠齋。

修此堂集

陳憲

先生字宕侯、鄉籍待考、清代布衣、著有修此堂集、出嶺吟、遊山草。見溫汝能纂輯之粵東詩海卷七十四。

出郡

青煙初放廣寧東、橋畔垂楊帶曉風。祖席難爲知己別、征車猶幸故人同。天連野闊千山出、雨後花開一路紅。此去玉城雲水隔、相思多在月明中。

博堂集

陳經世

先生字次文、號博堂、鄉籍待考、清代優貢生、官歷香山海陽訓導、見溫汝能纂輯之粵東詩海卷八十二。

寶安學署別女兒廣遜

愛女勝如珠、冰衙別老夫。但能行所誨、不用淚潛枯。知命安貧困、和衷悅舅姑。鹿車光史冊、豈必仗華廡。

鎔翁詩草

陳應掄

先生字鎔深、鄉籍待考、清代諸生、見溫汝能纂輯之粵東詩海卷九十五。

題北窗高臥圖

心在羲皇世、窗臨穉穉邨。四郊青上檻、五柳綠遮門。寂寂無塵夢、依依有鳥喧。南山遙擁榻、相對亦忘言。

柔存堂遺草

陳氏

女史夫門待考、乃陳華封之女、即恭允曾孫女、著柔存堂遺草、見番禺凌揚藻評輯之嶺海詩鈔卷二十四。又見溫汝能纂輯之粵東詩海卷九十七。

蘭雪堂春燕

雅聚詞壇興趣同、相歡沉醉畫堂中。詩吟白雪春留句、氣襲幽蘭香到風、衣逗淺痕餘酒綠、杯涵深影落花紅。幾回吟苦不知夜、光滿高槐月掛空。

寄又蕃弟

半林風雨秋將去、萬物蕭條樹欲枯。坐久自知情恍惚、愁多空廢藥工夫。堂前衰弱雙親老、膝下痴頑幼子孤。已矣此生休再問、少年甥舅可相扶。

閨五月憶亡女阿娥

重逢佳節不堪論、物在人亡祇淚痕。萱草幾曾忘舊恨、彩絲無計續嬌魂。風傳遠浦舟聲急、雨過疏簾日色昏。我亦有懷同楚子、離騷痛讀對南軒。

秋雁

一行嘹唳碧雲秋、輕把珠簾上玉鉤。遠信欲傳儂有恨、客鄉如寄汝多愁、聲悲霜夜天連塞、影落粧臺月印樓。十載離人聽未得、悔教夫婿覓封侯。

秋夢

秋事關心繫玉門、相思尋向夢中論。可憐紫塞多情月、常照香閨慣恨魂。畫閣乍驚蝴蝶影、淚珠空染杜鵑痕。懷人最是初醒後、孤枕寒燈冷繡鴛。

除夕

病久愁多只自憐、新春宿雨送殘年、兒童未解囊空盡、膝下猶爭爆竹錢。

臨終口占

以我今將死、堪憐母共兒。扶籬三歲小、霜鬢六旬悲。渺渺遼城鶴、濃濃紫府芝。仙人迎我去、何日是歸期。

拙圃詩草

陳勤勝

先生字拙圃、鄉籍容奇、清道光辛卯、公元一八三一年恩科舉人、亦詩亦畫、以遺餘閒。事略見咸豐癸丑縣志選舉表、詩一章、見順德市博物館藏順德歷代士林書畫專集。

自題漁舟泛波圖

怪石頽雲勢不平、西風捲出大江聲、漁郎笑傲煙波裏、醉指何人觸浪行。

容山詩草

陳象仁

先生字淡緣、鄉籍容奇、清光緒丁丑、公元一八七七年進士。事略見咸豐癸丑縣志、詩一章、見順德市博物館藏順德歷代士林書畫專集。

贈小明三兄

微暖春潛至、輕明雪尚殘。銀光鋪漸濕、珪破色仍寒。無柳花常在、非秋露正團。素光浮轉薄、皓質駐應難。

太平洋即事詩

陳麗秋

先生字蘭彬、鄉籍待考。按龍山陳緯南手稿清詩拾萃所載；同治壬申秋、出使美國、有太平洋即事詩云：

茫茫身世等浮萍、大海舟行不暫停、一線計程朝揆日、雙輪激水夜流星。澄鮮秋色空塵障、層疊波紋儼畫屏。已過蓬山將萬里、仍依北斗望朝廷。



女史字素恭、鄉籍容奇、清代曾官海陽訓導陳次文之女、嫻於詩、著有靜齋小稿、嘗受當時名士多所稱許、張藥房錦芳謂其思幽以閒。其旨淡以遠。見番禺凌揚藻評輯之嶺南詩鈔卷二十四。按咸豐縣志、廣遜適羊額何勤良爲妻。

草書歌贈潘文景最

結繩代遠無文字、蒼頡所作誰復識。後來創述轉紛紜、科斗篆籀生八分。三眞六草有妙理、技進乎道心通神。先生學古嗜草訣、金薤琳琅藏斷缺。臨池自覺凡馬空、怒猊渴蘆將毋同。胸中丘壑千萬重、興廢祇在三杯中。宣州散卓澄心紙、恨不羅致供驅使。綠窗近得覽君書、神趣直與時流殊。險如臨崖墜巨石、疾如千里馳神駒。矯如龍蛇蟠大澤、勁如松幹撐空虛。又如荆軻獻圖繞秦殿、十三舞陽顏色變。鴻門拔劍來項莊、寒光凌亂飛嚴霜。興酣落筆松棚下、乞書漸苦多車馬。高齋合置鐵門限、應俗精神費搏拈。君不見古來折釵屋漏痕、魯公筆法窺根源。又不見渾脫劍氣公孫舞、張顛妙悟非書譜。輪扁斲輪匠運斤、旁觀那能識甘苦。我生腕弱百不成、衛家夫人空典型。簪花格卑不足學、請公迴筆奔長鯨。他時摹搨試墨瀋、祇恐世有能書名。

黃節婦歌節婦適倫敦村周某周觸法遣黔婦與俱育三女一男周死負骸攜兒歸里行乞養姑有司旌其孝義余聞而作歌

鳳山之北倫溪水、奔流清徹無可比。曾經柱石產名流、邇來更出奇女子。嫁郎年少共糟糠、承歡菽水侍高堂。外事操舟內紡績、兩年比翼作鴛鴦。運乖忽作囚徒偶、夫遣窮荒妻疾首。偕行忍辱志彌堅、薜華竟擬寒梅瘦。去矣栖栖大道旁、三千里外飽風霜。施秉縣中共操作、艱難萬狀摧中腸。三女一男幸產育、呱呱忍見投懷哭。三旬九食冷炊煙、可憐藜藿充枵腹。

忽傷逝水去滔滔、孤鸞落日求其曹。仰天一慟城隅崩、千山草木皆呼號。蒼黃營殯已踰月、力護孤兒志何決。平生惟有一冰心、獨向黔中鬥寒雪。夢歸翻憶白頭人、廿年缺養長酸辛。南還上訴幸得請、邑宰亦念遐方民。檢束殘骸自茲始、鄉國茫茫何處是。數口啼從驛路中、一肩挑向寒山裏。自注南歸時擔圓筐二一置穹蒼上格見精誠、四山無雲天宇清。關河不隔歸飛翼、舊巢空盡餘柴荆。入門姑在翁先沒、眼中祇有斑斑血。遺孤雖得故園歸、阿郎已作重泉別。子身養老及全孤、乞食比鄰終不輟。吾聞共姜貞且賢、作詩上列三百篇。又聞王凝之妻有奇節、不受纖污臂堪折。自古貞風何代無、所貴蛾眉表丈夫。今之黃氏繼賢姥、十九年中倍孤苦。嗚呼、安得千仞石壁置我前、勒君奇節留千古。

方外遊詩

陳文藻

先生字忠、一字靜遠、鄉籍待考。性狷介、與增城海門寺僧覺海上人爲方外交、爲清代一位布衣。見番禺凌揚藻評輯之嶺海詩鈔卷十四。

嬰塘峽

夔州自古畏經過、路入巴山奈老何。攢石走江稜似鐵。紙舩飛瀨急如梭。濤翻白雪聲添咽、嶂疊青天氣欲摩。捩柁恰驚猿嘯處、旅魂先已懼岷峨。

陳氏詩存

陳官

先生字子洪、鄉籍待考、事略待詳、詩二章、見鄒崖逋者鈔讀之嶺南詩存、並附注文學二字及順德人而已。

夜過白頭嶺

驢背一肩簷、行行知幾層。山樓猿弔月、古閣鬼吹燈。石墜隨風落、潭寒點雪凝。少年心亦澹、何況白頭僧。

觀放箴口

燈色半明滅、陰風吹野燐。回看七尺影、轉眼百年人。衰草棲難綠、寒山慘不春。金鈴聲歇處、即是去來因。

碧玉小草

陳仲媯〈按即見前陳氏〉

女史鄉籍龍山、出身貧儒門戶、惟能苦學、課業小童、偶有詩作、見公元一九九三年順德詩詞學會成立出版順德詩詞第一期之歷代先賢詩選。

除夕

病久愁多只自憐、新春宿雨送殘年、兒童未解囊空盡、膝下猶爭爆竹錢。

靜觀閣遺草

翁張憲

先生字允斌、鄉籍羊額、清乾隆庚辰、公元一七六零年進士、負才華、惜年方二十九而卒遺著有靜觀閣草。列傳見咸豐縣志、詩章見番禺凌揚藻評輯之嶺海詩鈔卷九。

恭和學憲吳頡雲先生丹霞紀遊

登高須造極、濟勝敢辭難。鐵綆相牽引、螺峰遶鬱盤。雲深衣欲濕、風定骨猶寒。欲繪海山景、歸懸四壁看。

秋日西樵雲路社謁抱真子墓讀霍文敏撰碑有感

名山遺壘草蕭蕭、苔碣閒看寄慨饒。高士行成同放廢、古風人仰挽浮澆。江門道脉薪傳重、雲路溪毛社祭遙。節概時流言過實、渭厓真善表芳標。

讀杜少陵秋興八首題後

遲暮神傷增寄慨、秋聲同寫更悲號。秦關遠阻憐孤客、蜀道飄零感二毛。憂國念深同變雅、忠君情苦類離騷。長吟草閣真詩史、風雨瞿塘起怒濤。

攜雪軒詩鈔

溫汝适

先生字步容、號箕坡、鄉籍龍山。生有異質、少即端凝、肆力學問。清乾隆四十九年甲辰、公元一七八四年登進士、授翰林院編修、入直尚書房、監臨京兆試場、遷太僕卿擢兵部右侍郎。先生居官謹慎、朝中共許正人。以母老告歸、閒居無他嗜好、惟以書卷自娛、著有咫聞錄、曲江集考證、曲江年譜、攜雪軒詩鈔、文鈔等。列傳見咸豐縣志、詩章見鄒崖逋者鈔讀之嶺南詩存。又見溫肅輯錄之龍山詩錄卷上。

雪後過吳江

垂虹水冷浸玻璃、雲母窗明袖手時、渾似關山風雪裏、氈簾不捲過胭脂。

武勝關

荆豫襟喉此最雄、山川形勝入環中。淮從北折連河駛、江自西來與漢通。澗水近侵延鷺堠、戍兵閒引射麋弓。黃雲滿谷千箱溢、還聽田家說歲豐。

重九遊少陵草堂寄酬陳鼇麓明府

兩年佳節各他鄉、叢菊初開客思長。歸路正尋金雁驛、新詩遙寄碧雞坊。人家錦里連江水、秋色愷林隔草堂。猶有荒庭宜對酒、飛鳧何事遠相望。

讀咸中兄遺集有感而作

南紀波濤壯、何人涉巨溟。凌雲惟健筆、擊水必修翎。一卷珠盈握、當年劍發硎。興酣才敏捷、神朗思瓏靈。曾任安期宅、兼書子玉銘。忘歸因攬勝、求友爲窮經。虎嘯松門合、泉飛蝶夢醒。遙觀海水綠、坐對簡編青。暮許樵夫看、琴無俗客聽。遐心方灑落、雅質遽彫零。古錦空留句、丹砂不引齡。草堂仍寂寞、奇樹惜芳馨。往事如驚電、時過數落莫。

碧池詩鈔

溫聞源

先生字華石、號碧池、鄉藉龍山小陳涌。清乾隆庚子、公元一七八零年進士、官歷內閣中書、念名成遲暮、親不及見、乃輒飲泣、便歸里閒居以卒、寫有大成殿重修記一篇、並見咸豐縣志、順德歷代邑人尊孔文選、詩章見溫肅輯錄之龍山詩錄卷上。

歲暮懷人爲馮菽園

白髮高歌氣未平、忽聞持戒戶常扃、世間壘塊消難盡、未必容君卻獨醒。

前題爲余北亭

形骸之外有斯人、歷落嶽崎孰與論、休怪詩狂兼酒癖、定應龍性未能馴。

前題爲蘇硯岩

貧如原憲容何病、坎坷如君更可哀、數載官衙無長物、窮愁偏自逼人來。

前題爲步容姪

計程應度越江濱、馬足車輪動浹旬、白髮有人常夢到、會須珍重苦吟身。

炙硯

節後纔經九九晨、冰凝方硯托燃薪。暖涵繡錦松煙上、凍解坳池玉乳勻。似有源頭來活水、漫從筆底借陽春。興酣對案多如意、灑向雲藍字字新。

澆書

睡起朝暎入座來、捲簾雲影四山開。胸中佳意涵千卷、眼底晴光托一杯。別有酸鹹留至味、絕無渣滓到靈臺。平生世態疏酬酢、只合神交故紙堆。

綠朝雲

慧業誠何必、聰明事亦非。誤承金屋寵、長傍玉龍飛。飲啄思紅豆、傳呼近繡幃。侯門深似

海、何日隴頭歸。

自吟草

溫濟川

先生字起劍、號石瓢、鄉籍龍山大陳涌、清乾隆甲子、公元一七四四年副貢、見溫肅輯錄之龍山詩錄卷上。

謁張忠諫祠

瑟瑟寒風響繞廊、悲號如聽禁門傷、諍君只合分邪正、議禮寧當較短長。已見義能平大獄、轉難忠以格明皇。高山我欲尋遺跡、何處梅花別有莊。

過吳貞女墓

白楊慘淡鎖寒煙、古廟留將表節堅。香國結緣供淨土、柏舟遺恨泛重淵。此離花命生非計、剝落蓮心苦孰傳。見說甘泉佳誌在、碑殘芳草只芊芊。

觀柯棲壑履

色相全空外物情、獨留雙屐寄幽貞。金沙脫後燈誰續、浙水行歸道已平。跋涉尚存吳越跡、囹圄同染雪霜清。袈裟間有諸藩襯、不見傳衣誌典榮。

和家登于秋夜諸子過柳塘小飲分韻

卜築幽棲好、軒車小到門。徑門招二仲、草長繫王孫。露侵疏桐冷、風依密竹喧。一庭荇藻亂、相對意忘言。

清光開勝地、靄靄散斜暉。共領幽人趣、寧忘靜者機。霜深橘柚熟、秋老鰕鱸肥。詎用招邀約、狂歌叩板扉。

高樹環溪矗、一枝可託巢。游魚時策策、棲鳥閒交交。素魄流空照、新詩任客敲。秋風殊料峭、誰解子雲嘲。

醇齋詩鈔

溫士剛

先生字鬯登、號醇齋、鄉籍龍山小陳涌、清代太學生。著有醇齋詩鈔、見龍山詩錄卷上。

題北窗高臥圖

晉祚將移日、高人醉石溫。羲皇情有託、薇蕨意無痕。遠岫橫窗隙、涼風到耳根。悠然亡旦夕、清賞對琴樽。

海忠介

先生憂國獨情深、身後寧知葬乏金。貴日不移貧日志、哭時猶是諫時心。殿廷直折朱雲檻、臺榭清閒趙忤琴。卻怪鼎遷人已往、碧埋何事血淫淫。

濂渚詩鈔

溫丕謨

先生字遠猷、一字濂渚、鄉籍龍江小陳涌、清乾隆乙卯、公元一七九五年舉人。著有濂渚詩鈔、事略與詩章、見溫肅輯錄之龍山詩錄卷上。

讀狄梁公傳

朱紫臨朝事已非、從容補救似公稀。斗南聲價瞻威重、河北安危屬指揮。兩翼久摧誰悟主、五龍潛受竟同飛。平生漫托委蛇術、絕勝嵩山理釣磯。

白鹿臺

南武遺蹤錦石東、登臨依舊陣雲籠。三時獵狩規模闊、半壁河山犄角雄。楚漢已誇同逐鹿、蠻夷那肯學冥鴻。馳驅校獵心長壯、終古高臺嘯晚風。

帆影

一片春帆影、輕痕認未真。遠浮孤客夢、望斷倚樓人。帶月涵溪館、因風掠晚津。長江流不盡、夜夜往來頻。

半水詩草

溫伯玉

先生字白生、號半水、鄉籍龍山大陳涌、清代諸生、著有半水詩草、事略與詩、見乙亥溫肅輯錄之龍山詩錄卷上。

觀奕

天下原無事、人間局未空。戰酣殘日裏、聲亂落花中。退步師黃老、求和笑狡童。旁觀多袖手、何暇辯雌雄。

聞鐘

萬慮一聲澹、人間夢未驚。感茲忽有悟、入世苦多情。帶月來何處、兼霜聽倍明。不須終八百、深覺此身輕。

敏慎堂詩草

溫啓兼

先生字潔夫、號浣亭、鄉籍龍山大陳涌、清代太學生、著有敏慎堂詩草、事略與詩、見乙亥溫肅輯錄之龍山詩錄卷上。

春日鑑江即事

有興尋芳去、停舟碧鑑前。波光寒未盡、雲路暗相連。春色如圖畫、鶯聲逐管絃。江城花事鬧、良夜任蹁躑。

小春夜光樓上對菊

早梅作蕊漫相催、正好黃花次第開。入戶晚風薰几席、滿天寒月照樓臺。登臨每有新詩句、酌酹那無舊酒杯。有客不愁今夕永、知心人得共徘徊。

至都得晤五弟口占一絕聊以見懷

萬里遙遙看弟官、更攜子姪慰心寬。漫言大被南天暖、八載常懷北地寒。



自怡草

溫賢超

先生字登于、號義窓、鄉籍龍山小陳涌、清代諸生、著有自怡草。見溫肅輯錄之龍山詩錄  
重修學宮落成紀事四首

大地開文教、欽崇萬世師。宮牆思在昔、日月仰當時。邑以人文著、風從鄒魯移。賢侯經畫處、聖域奠於茲。

踵事循公議、更新守舊基。喜因興作力、遙得典型遺。鳳翅依山見、雲梯榜砌垂。地靈人巧合、輪奐已如斯。

殿閣參差出、垣墉變易宜。文明看有象、炳蔚見稱奇。裘集千狐腋、機呈衆繭絲。泮芹欣薄采、爲頌魯侯詩。

盛事叨相引、微才謬見知。躊躇期滿意、結構幸逢時。求助資朋錫、觀成協衆思。光華稱復旦、士類慶揚眉。

退一步軒詩鈔

溫汝達

先生字泉始、又字安波、賢超之子、著有退一步軒詩鈔、事略見溫肅輯錄之龍山詩錄卷上  
醉後放歌

南樓坐對高秋月、綠醕今宵醉兀兀。醉來吟興發清狂、百篇尚擬追前傑。臨風歌憤獨憑闌、浮雲散盡天宇碧。村燈幾點疏如星、四顧無人霜氣白。高歌驚鷗起危巢、振羽出林聲磔磔。長空朗朗籟生虛、頓覺煩襟冰消釋。參橫月落不勝寒、一時詩思清肌骨。

書靈淵弟詩後

恰如元鶴淚清臯、怪得雞林索價高。吟笑候蟲輕爾雅、句搜香草愛離騷。半天風雨先聲壯、五嶺山川爽氣豪。會得蠻箋須記取、鳳樓添助爾揮毫。

謙山詩鈔

溫汝能

先生字希禹、一字熙堂、鄉籍龍山小陳涌。清乾隆戊申、公元一七八八年舉人、官歷中書科中書、未幾、歸以著述顯、有謙山詩鈔、文鈔、孝經約解、龍山鄉志、粵東詩海百零六卷、文海六十六卷傳世、年六十四卒。事略見咸豐縣志、詩章見溫肅輯錄之龍山詩錄卷上粵東詩海自序

自唐以詩取士、海內多事聲律、五嶺以南、作者奮興、日月滋廣、遂蔚爲奇觀。明區啓圖嘗會萃諸集編爲嶠雅、採擇孔翠、芟簡繁蕪。自唐迄明、得五百餘家、可謂盛矣。而刊未及、竟浸已散佚。國朝乾隆間車蓼洲、羅石湖、何西池諸先生、懼其久而散、散而無以徵其奇也、更爲廣徵博刻、已囑番禺馮箕村啓局於羊城、遠近郵寄、繩繩不絕、乃功未及半、亦相繼殂謝。今所傳嶺南文獻、廣東文選、五朝詩選、廣東詩粹、或搜輯未富、或採取未精、均未足以盡其奇。夫粵東、固海國也、昔在大荒水泛無歸、天乃廓靈海導百川而注之、江河之大、瀝滴之細、莫不來會。其在東粵、若黔若灘、若鬱若賀、若湟泉、若滇水、若槎江、若漢陽、若濂鑑欽韓諸大川、悉皆網絡、群流商擢、涓澮會於南海、嘯喻洗滌、經途澠溟、遂成巨浸。蛟龍鯨鯢、鼉鼉蜃鬣、珊瑚珠璣瑇瑁之屬、咸育其間、此番禹之所以成都會也。向使百川潛滌、涓流決瀆、僅得藪澤、以爲之匯、亦安能匯其歸哉。粵自曲江以來、文獻已開、薦紳解組歸、往往不事家人產業、唯賦詩、修歲時會、至於今日、廊廟之英、山林之彥、類能文章、嫺吟詠、雄者豪者、淡者雅者、勁而健者、高而古者、綺麗而典則者、自然而平者、各建其旗鼓、以馳騁中原、大則縈迴盤礴、千變萬狀、洋洋乎、如修江萬里、巫峽千尋、小則漪漪清潤、如漪流、如春泉、采采蓬蓬、絡繹交會、無淺深廣狹之不得其源、而觀者猶不免崖涘之見、則未有海以爲之歸也。余已論次、桑梓之文、復遍徵詩詞、自甲子迄庚午

凡七閱寒暑、四方緘寄者千餘家、與二三同志稍加裁擇、咸使雅馴、其得詩一百卷、補遺六卷、上自公卿、下徵謠諺、旁及僧道、幽索鬼神、無體不有、無奇不備、書成名之曰、粵東詩海、其亦庶幾人文之淵藪矣。且夫詩者、所以觀民風者也、故古者、太史嘗乘輶軒採之四方、天子巡狩所至、亦命太師陳之、以觀其貞淫、夫風之貞淫、由於習之邪正。粵東居嶺海之間、會日月之交、陽氣之所、極陽則剛、而極必發、故民生其間者、類皆忠貞而文明、不肯屈辱以阿世、習而成風、故其發於詩歌、往往瑰奇雄偉、輾轢今古、以開闢成一家言、其次者、亦溫厚和平、兢兢先正典型、不爲淫邪佻蕩之音、以與世推移、是則廣東之風也。後之覽者、因其風而知其習、因其習而求其人、則文獻文莊白沙忠介之流、其猶有興焉者乎、徒以詩爲詩、則雖海涵嶽負、無物不具、猶未足以盡其用也。嘉慶庚午（公元一八一零年）孟冬順德溫汝能書於聽松閣。

過泰安州擬遊泰山不果寄稚存編修

平生頗好遊、足跡半天下。白首老風塵、青山倦鞍馬。計自長安來、朔風掃原野。十日不見山、私心恨相左。迢遞齊魯交、泰山忽峨嵒。夙聞此山高、夜日如觀火。巍巍矗天半、群山悉斜老。雲冷疑雪封、煙寒同霧鎖。覲面安無緣、催程嗟不果。回首山已遙、入林臂誰抱。五岳一未登、竹垞非欺我。聞君登其四、斯具濟者寡。愛山慕君癖、思君笑余跛。惆悵舍山去、日夜思君可。

和竹溪寄題衆芳園六首（錄四）兼寄旻若五弟

秋風不獨憶鱸魚、擬賦歸來日著書。林下有誰堪把臂、詩人聞道夾溪居。  
長安作客夢猶存、此地知無車馬喧、只恐八叉年尚少、未應閒臥向邱園。  
客緒茫茫帶雨眠、故園歸夢似前年、憑君新句遙相憶、起我臨風寄一箋。

風風雨雨遍天涯、憶汝園中幾樹花、但得曲池堪鬥鴨、更宜清渚學撈蝦。

客中述懷

休言客久食無魚、此去鱸肥興有餘。退學自然思補過、無求真覺羨閒居。青山月夜曾留約、流水桃花任起余。更念庭前兒解讀、歸來急爲檢藏書。

戊午春暮歸里黎丈萱階以詩見貽賦答

昨夜讀君詩、令余醉醇酒。一飯一吟哦、焉能遽釋手。渭南真少陵、在蜀年最久。埋才當亂世、流涕嗟白首。元真樂煙波、嚴陵堪比耦。青笠與綠簑、甘作釣魚叟。二子志不同、詩骨皆未朽。雪窗曾高詠、月色生疏牖。終憐學杜人、憤淚羅多咎。不如荻花飛、長喜鱸魚有。舍陸寧慕張、捫舌復緘口。鷗鷺與爲盟、時時向林藪。此樂果何如、神仙乃消受。丈人聽莫笑、賤子言是否。明朝爲舉竿、相期傍春柳。

丁巳中秋箕坡竹溪招同童小厓登陶然亭復遊崇效寺晚集泛香吟舫看月用中秋二字爲韻  
秋色年年在、幽心處處同。此亭自今古、予馬任西東。目極千林外、山歸一鏡中。倚闌殊未已、還與入雲叢。

門隱孤煙鎖、花香冷院浮。僧袍黃似葉、客意淡如秋。看雁思歸近、開樽序樂周。豪懷逢小謝、好月恰當頭。

讀武鄉侯出師表

先帝遺言猶在耳、重臣掌國直如家。文章久已傳伊誥、心血今仍燦蜀霞。司馬天生留兩晉、臥龍神算限三巴。英雄豈必關成敗、撫卷偏令熱淚加。

讀李令伯陳情表

一家幾見百年親、喜懼交并語自真。已廢蓼莪重下淚、忍教菽水更無人。夢魂尚有酬君日、

歲月難留報母春。世上倚門多白首、好傳仕路各書紳。

村居感事時己巳九月十六日

冷寂幽窗不自持、重陽度後苦無詩。秋容爲寇人同瘦、夜鼓傳戈柝亦悲。百里關河飛羽檄、萬家煙火走斃嫠。此身高臥慚何補、惆悵東山月上時。

庚午元旦書事兼柬約中諸君

六十三年似夢醒、春歸河畔繞雲青。梅花尚帶嚴寒雪、海氣猶餘舊壘腥。豈有陰霾終閉日、從無巨澤不生靈。諸君好備匡時策、愧我徒傳皓首經。

### 寄匡詩鈔

溫汝科

先生字階爵、又字漁溪、又字寄匡、鄉籍龍山小陳涌。清乾隆己酉一七八九年舉人、官歷南雄訓導、著有寄匡詩鈔。事略與詩、見公元一九三五年乙亥溫肅輯錄之龍山詩錄卷上。

三月三日同吳荷屋篋坡兄竹堂弟雲譜承悌二姪遊釣魚臺以所以游目騁懷爲韻分得懷字上已氣清和、興發集同儕。駕言適近郊、嘉樹方垂街。午陰揚塵淨、曲折循津涯。釣魚昔賢遠、風浴茲遊佳。童冠六七人、悠然與之偕。浮鱗淵中潛、逸羽天際排。陟阜縱高目、敷席伸雅懷。柳青雜榆莢、桃緋耀松釵。紅綠鬥芳妍、來往駐騶駝。馬怯度危橋、客倦尋村齋。習射或持弓、垂綸坐枯柴。沮洳闡成湖、行旅水無乖。灌溉利農桑、游觀亦孔皆。豈惟豁心胸、實足外形骸。長林澹餘暉、好鳥鳴啾啾。徘徊空潭上、俯仰愜所懷。

舟過泮浦

日午纔過泮浦前、如花白浪湧長川、樹菴樹上離支熟、風送蟬聲落客船。

遊平山堂用東坡妙高臺韻

春初過維揚、指點得舟子。空慕平山堂、違山尚十里。北上今南歸、相去數月耳。小航三五

人、棹自城隅起。數曲抵山腳、周道乃如砥。有僧如舊識、遍引坐玉几。一酌第五泉、寒冽甘浸齒。世事等浮雲、行蹤似逝水。仙翁若可見、壁上龍蛇是。何當從之遊、騎鶴來無死。

留別都中諸子

海燕高飛剪尾齊、畫檐無處著春泥。歸心自笑題鴻爪、舊夢誰憐續馬蹄。此去廣文官復冷、何時國子石方題。廿年十度盧溝水、回首都門日漸西。

環翠山房詩集

溫汝驥

先生字逸群、鄉籍龍山小陳涌、清代貢生、著有環翠山房詩集、事略與詩、見龍山詩錄。

春日村行

屋傍桑麻四五家、溪流之折路三叉、鳥穿古社綠溶樹、蜂鬧短牆紅杏花。

先慈諱日夜與諸姊妹悶坐慨然有作

先慈諱日臨、一日生悲心。越夜在堂中、怏怏自沉吟。憶母產兒時、母命不能支。兒何生在茲。蒼天復蒼天、兒萬死何辭。吁嗟生我恩、欲報無窮期。兒當念及此、不禁淚漣洩。姊亦淚漣洩、妹亦淚漣洩。旁觀者奴婢、相與爲歎歔。惟兒恐父聞、轉增老父悲。勉力事繼母、如吾母在時。斯時夜已寂、靈寢杳無息。一座闔孤燈、四壁蟲唧唧。

古樓張孝女歌

古樓孝女張三姑、閨中孝烈天下無。平生未展古訓讀、至性獨與凡人殊。孝女有父字孔孚、五旬無子長嗟吁。一病經年命幾絕、百藥罔效天難扶。孝女覺覺獨哀泣、可憐老父徒孤立。父存似續或可延、父死後嗣安可出。捶心瀝血哭鬼神、引刀刲臂傷肌骨。一時至孝感蒼旻、遂令乃父起羸疾。嗚乎此女竟死孝、溘然長逝天不弔。見者傷心聞者悲、鄉閭遠近皆啼叫。當年烈事播詩歌、至今風示留祠廟。梯雲山下謫仙亭、翹然女樹獨冬青。天地鍾靈多變幻、

閨秀何地無奇英。君不見緹縈救父、木蘭代親、上書繫獄、詣戍從軍。芳名遺烈古今聞、此女豈必非其倫。恨無好事勒山石、比美曹娥永無極。

### 靈淵詩鈔

溫汝驥

先生字北雄、一字靈淵、鄉籍龍山小陳涌。清乾隆己酉、公元一七八九年舉人、官歷雲南府同知、遺著有靈淵詩鈔。事略與詩、見溫肅輯錄之龍山詩錄下卷。

### 論詩

學詩有其門、當自唐賢入。摩詰與樂天、二子宜擇執。先務工五言、繼乃就長律。絕句易而難、反約須時日。近體苟成章、古調始可習。正變自有別、音節更不一。追蹤期漢魏、源從三百出。六朝數鮑謝、餘子不足述。曲江開風氣、作者遂林立。卓卓李杜韓、鼎足罕與匹。宋元千百家、僅見東坡集。明初稱四傑、前後子有七。我朝多名家、鳴盛各俊逸。要皆裁偽體、風雅庶不失。宜古復宜今、古今人相及。而汝今學吟、取資貴專一。由淺而入深、漸進有等級。遺言先命意、立局謹下筆。求安爭一字、未可任輕率。屬對動經年、無或事勦襲。已精益求精、妙蘊抽乙乙。絢爛造平淡、叉手能事畢。汝父有遺篇、歸求勝負笈。我是過來人、教豈有他術。從此紹箕裘、不難窺堂室。儻墮野狐禪、必愧江南橘。邇來賣菜傭、呻吟亦成帙。紛紛類蟬噪、固不值一叱。

### 太和宮

斷橋鎖黃雲、隱約鳴鳳麓。嵌空一殿高、俯視鱗鱗屋。吳藩昔未叛、全滇此湯沐。構造矜獨創、不遺求大木。鑄銅竟成室、渾金色比菊。挖鑿民塗肝、輸運車擊轂。汰侈亦已甚、寧知傾者覆。繁華一剎那、空使鬼夜哭。我來覽遺跡、祇覺銅臭辱。頂禮北斗垣、長嘯散林谷。

津寄齋詩鈔

溫汝進

先生字履安、又字杯湖、乃賢超之子、清嘉慶癸酉、公元一八一三年舉人。著有津寄齋詩鈔傳世。事略與詩、見溫肅輯錄之龍山詩錄下卷。

題黃虛舟內兄鴻雪齋贖稿

鳳山秀所鍾、挺生多俊哲。南園歐梁後、風雅今爲烈。僕指胡張黎、與君並邦傑。雲水擊南溟、苞羽輝丹穴。諧合奏鈞韶、聯翩佩環玦。盧王孰後先、沈宋漫優劣。惜皆中道摧、散若天花瞥。贖喜詩卷留、遺跡感鴻雪。緬昔缶盈堂、培厚芳齊茁。玉昆而金友、驥首遠奔軼。人爭詫二難、君先擅三絕。詞賦早知名、耆宿心爲折。玉樹勢崢嶸、冰壺光皎潔。苦心學陳何、逸翰追軾轍。雲罕揜雅材、舍是復奚設。鄉貢困始遭、巍科終莫掇。花讓少年看、瓠伴老儒啜。面目混屠沽、不周聊縱繼。鄙人忝嘉姻、登堂荷提挈。高樓聽雨夜、曾聆劍首訣。自悔造膝疏、未受錦囊訣。駕虬忽西邁、瞻望徒哽咽。頗聞撤瑟時、丁寧屬孤孽。苦嫌詩未工、殘稿勿昭揭。詣高衷自虛、寶埋彩難滅。平生富篇什、狼籍付蟲齧。珍裘餘片羽、文木存斷節。誰能任沉湮、群思廣拾掇。元豹窺一斑、覺與文狸別。矧茲三百首、六丁渾未掇。清氣儼汎蘭、勁草疑裹鐵。靄靄春雲生、裊裊鑪煙結。丹青入品題、神理能鉤抉。是惟妙明心、故現廣長舌。雅欲播藝林、鳩工細刊掇。匪與遺言悖、實由嚮往切。哲嗣誦清芬、鸞音九霄徹。登瀛薄言旋、展墓心如噎。凜然守先訓、謂此役可輟。我聞名山藏、原非秘局鎖。立言志千秋、遙遲懸鏡澈。豈如嶺上雲、只堪自怡悅。荒儉飾虛車、覆瓶緣萎茶。君詩肖君品、白珪無玷缺。風宜輶軒採、名合文苑列。幽光如不闡、齋志將何泄。焦桐尚入聽、黃鐘忍毀撤。斯篇貢玉堂、騰翰足頡頏。代興羨子賢、擊撞慚余拙。作詩志曩蹤、且爲知者說。

冬夜寄懷竹堂弟四首



玉樹移栽上苑旁、閒雲懶逐雁來翔、天湖落日登高處、記把茱萸憶季方。  
見說新披藻飫文、金盤玉筯挹芳芬、婁胸方自天家領、滌髓承顏倍覺欣。  
封胡羯末一家才、佚蕩天門迤邐開、佇看聯吟風雪夜、玉溪花萼集堪裁。  
青編兀坐舊蝸廬、月冷迴塘感索居、不寄梅花聊寄語、好將詞賦擬相如。

### 竹堂詩鈔

溫汝遵

先生字旋矩、號天堂、賢超之子、汝适汝進之弟。官歷詹事府主簿、著有竹堂詩鈔。見溫肅輯錄之龍山詩錄卷下。

### 栽竹

千年修竹藏解谷、結實時時鸞鳳宿。歲寒凡木盡凋零、獨伴蒼松澗中伏、愛君高節欲相親、但恨客舍居無竹。聞兄開徑活籜龍、意紀卑之徒免俗。晨興戒僕荷鋤去、不問僧居與林麓。移來正值秋雨翻、洗淨千竿對幽築。入林清興羨五君、更擬退飛隨駝六。我今亦欲栽數个、以筆爲插墨爲沃。風枝露葉隨意生、與我周旋常不獨。洋洲一派何處尋、發篋時將衛詩讀。解衣槃礴手書空、欲畫低徊指畫腹。貌君如和白雪辭、吟成翻作巴人曲。何如屋角響蕭蕭、風雪離披仍故綠。明年春雨土膏流、翠葉含煙吾願足。

丙辰歲十一月十九夜家兄雲坡置酒招同張船山檢討趙味辛舍人童春厓孝廉從兄謙山小集

### 泛香吟舫分韻得厓字

竟從一醉見襟懷、松火談詩就破齋。始信豪吟元蘊藉、不妨莊論雜詼諧。當前珠玉看如許、千古文章願未乖。肯與孟公扳轄飲、任教寒月落西厓。

### 印可齋詩鈔

溫汝造

先生字水南、亦賢超之子、著有印可齋詩鈔二卷。見溫肅輯錄之龍山詩錄卷下。

七月二十日禱雨金紫峰是日大雨

雞鳴出閭巷、踏盡松月影。嶽岑金紫峰、縹緲開靈境。低頭禮白衣、默訴不敢請。去年河內饑、內府輸金彈。今年南方旱、大吏卻五鼎。皇皇謀調劑、嗷嗷待朝餉。良田龜兆坼、下隰無新穎。吾身雖微細、要是四民等。人生難去食、此慮常怲怲。況當朱炎赫、煩熱誰能屏。惠然賜甘霖、豈敢懷微幸。山門曠遠矚、煙霧蒙光景。晨星乍有無、缺月掛西嶺。紅霞橫一抹、涼風集衣領。歸途望雲氣、洶湧生俄頃。入門雨翻盤、階墀深沒脛。解衣恣盤礴、暑退窗戶冷。天公未可貪、引滿聊酩酊。

幽居即事

令節清明過、餘寒尚未開。柳梢頻滯雨、樓外有輕雷。吠蛤依豐草、遊絲滿古槐。此間多逸興、吟龍輒銜杯。

樂愚叔父哀詞二首

一老如何不天遺、瑤臺仙路擁歸旗。典型想像空趨步、名德流傳在鼎彝。畫虎不成曾有誠、家駒借譽愧虛期。傷心別墅閒遊處、颯颯靈風滿蕙帷。  
不徒鄉里善人稱、隱德猶當奕世興。范氏莊田皆負郭、鄭公門戶可通乘。舊醅頒至頻濡首、凶問傳來但拊膺。蔥肆他時如得返、竹林故事已難徵。

珠江水調四首

畫舫如棋佈、銀缸若列星。喧闐爭渡處、時逗賣花聲。  
潮回日已升、羅襪冷如冰。遙盼夷樓上、猶殘九子燈。  
聞說西洋宅、玲瓏百寶裝。今朝風日好、同上十三行。  
春煖錢仍小、秋涼葉已衰。芙蓉猶薄命、妾貌欲何爲。

泛香齋詩集

溫承悌

先生字怡可、鄉籍龍山小陳涌、汝适之子。嘉慶丙子、公元一八一六年舉人、特賜進士。官歷翰林院庶吉士、刑部主事。著有泛香齋詩集。事略與詩、見溫肅輯錄之龍山詩錄下卷

潘小裴比部訪余龍山賦贈三首

一別十年事、光陰儼若馳、何期空谷裏、重覩玉山姿。畫省聲名重、良材出入宜。春來雙闕近、遙夢白雲司。

倒屣故人至、中庭月色靄。足音良可喜、村甕爲新開。未遂維駒願、旋看畫船回。深談憑話舊、燭跋莫相催。

性懶成樗散、衡門養拙頻。偶耽三徑月、虛老百年身。攬鏡空搔首、含毫詎有神。洛陽親友少、心跡向誰陳。

歸泊沙口

依舊風帆沙渚橫、驪歌聲換櫂歌聲。七千餘里遠鴻至、三十六江春水生。篋裏采牋書欲盡、樓頭紅萼照初明。沙腰舊少垂楊樹、芳草萋萋管送迎。

溫氏家聲

溫子顥

先生字筠栖、鄉籍龍山小陳涌、爲清代太學生、事略與詩章、見溫肅輯錄之龍山詩錄下卷  
秋瀛叔父借觀家藏宋拓醴泉銘賦詩見示疊韻奉答

古香分得自鸞臺、馥馥芳芸護墨煤。薇掖久珍重錦囊、蘭亭初展萬花開。賞從河間饒聲價、秘若中郎合笑嗤。欲作五湖圖上壽、寶田端爲舊詒來。

彩毫高邁妙楷臺、狼藉衫痕漬麝煤。閔苑聲華承旨重、瑯琊家法右軍開。書經鷗借尤滋喜、帖誤鵝還亦可嗤。慚愧塗鴉殊彥遠、淵源空詫竹林來。

孟亭詩稿

溫子頌

先生字孟亭、清代太學生、汝适之孫。詩章事略、見溫肅輯錄之龍山詩錄卷下。

張忠諫鐵鐘并序

鐘在吾鄉漱玉泉上天后廟中忠諫少嘗患病翁禱於神獲愈因鑄鐘以答神佑及大禮議起忠諫拜杖日鐘忽裂啞今仍存有銘漫滅不可句讀

追蠡猶存碧血蹤、蒲牢不吼蘚紋封。聲鏗枉自傳郎署、錯鑄終難悟世宗。九廟有靈悲玉簫、故山無恙感雲淙。一鳴動係朝廷福、深慨宮懸瓠不容。

寄呈乃山叔祖二首

老輩晨星尚幾存、如公行誼更相敦。較同輅慶唐初古、殿巋靈光魯國尊、少日姓名聞婦孺、半生心跡在田園。交深五代真關切、先德時還藉細論。

祖孫庠序振家聲、七葉欣開族譜成。明德達人知有後、前朝志乘早留名。(註一)里仁共羨宗常聚、(註二)俗薄偏教品獨清。(註三)三世一門稱孝弟、最難無間是鄉情。


(註一)吾族自始祖東昇公以名進士遷粵、七傳至一齋公、始列膠庠、十世覺斯公以名諸生紹起、高行博學著郡志中、實爲吾宗科名所自始、皆乃山叔祖本宗也、而族譜之作、亦創始於一齋公。

(註二)叔祖所居曰仁壽里、自四世以下、子孫皆同里而居。


(註三)叔祖以品行見重一時、鄉閭矜式。

讀書二首錄一

讀書原不易、過後自然知。能讀時曾幾、吾生信有涯。饗飧供父母、家室樂妻兒。此日當仁者、誰非不讓師。



癸卯年十一月十日 香港學海書樓 叙同人科辰甲，卯癸



溫 肅 朱光樞 陳念典 區大原 賴際熙 周廷幹 區大典 朱汝珍 左 蔭 陳煜屏

溫毅夫中丞遺像



溫文節公遺墨

一旦天子巡朔方，壯奮兵掃四夷之塵，較改陽之獵，則飛黃裏，腰箭雲，追電何所從，而還壽。 又同世仁人 莊后 毅夫溫亦曰云

門下士 鄧又同珍藏

公字毅夫、號壁菴、追諡文節。清光緒四年戊寅、公元一八七八年生於原籍龍山隔岡。父諱黻廷、登清同治七年戊辰進士、官歷戶部主事、及退、里居授徒、世稱藻裳先生。公承家學、舉光緒二十八年壬寅、公元一九零二年順天鄉試、翌年成進士、授編修。歷湖北道監察御史、慷慨有直聲。鼎革後回里家居著述、晚遊海隅、講學香港大學、與當世儒林、東莞陳伯陶、番禺吳道鎔、清遠朱汝珍、增城賴際熙、南海區大典、區大原、李景康、同邑岑光樾、何翹高等、時作文酒之會、發宋臺之秋唱、開學海書樓之講座、以揚國粹。至公元一九三九年歲己卯疾終里第、春秋六十有二。列傳見民國己巳縣志、事略見廣東文徵續集、學海書樓七十周年紀念文集、詩章見公歿八年哲嗣中行付梓之溫文節公集。備載公平生之重要文獻書札詩章、其中有：

龍山詩錄序

詩三百篇、本多里巷歌謠、自轡軒廢而詩選興、試律開而篇什富、唐宋以降、即廣州一隅、詩人輩出、其翹異者、且狎主中原、騷壇之盟、詩、固不以方隅限也。龍山之在廣州、尤小耳、然自明以來、代有作者。敬齋玉泉、大節標於青史而遺著無多、黃周士父子始以麗藻稱於時、逢永與雲淙結社南園、聲華尤茂、蓋已由椎輪而進於大輅矣。巖野獨漉、接踵嗣興、更以忠孝發爲詩歌、浩氣噴薄、雄直希古、海內宗焉、浸淫廣衍、逮乎乾嘉、斯稱極盛。當是時、吾家篁坡謙山諸公、提倡風雅、同時一家之中、以詩鳴者二三十人、豈風尚使然歟、抑山川靈秀之氣獨厚也歟。余昔輯龍山鄉志藝文略有集著錄者、凡百十五人、而留存至今者十纔一二、憫其苦吟畢世而不傳也。搜訪屢年、片鱗寸爪、網羅靡遺、止得九十人、多者百數十首、少或一二、釐爲若干卷、冀以詩傳其人焉已。嗟乎、士無論窮達、跡其致力所在、

劇心鉅腎、以求一字一句之安者、凡以爲名也、孰料收效之相反如是哉、由是以觀、名之傳不傳、固有命焉、而吾顧以勢所不能久傳者而強使之傳、不其慎歟。雖然、能爲詩者、必讀書、能讀書者、是非必不謬於聖賢、其取法亦不出杜韓蘇黃、能爲杜韓蘇黃之言者、必不敢以邪說誣民、充塞仁義、然則詩一日未亡、王跡一日未熄、即五帝三王未大去其天下也、吾此舉又烏可己哉。同里溫肅序。

題御筆畫菊

淡白繁英間紫黃、天教留與點秋光、丹青事業非難致、晚節能堅便永芳。

又

生來不受雪霜侵、德備黃中氣稟金、意與西風同一淡、最難畫得是秋心。

辛丑不第感賦

十載名場寄此身、時艱無望濟斯人、草廬歲月匆匆盡、花樣文章日日新。縱有蠅頭堪療困、總緣龍性苦難馴。男兒事業吳鉤在、一笑狂歌天地春。

放眼中原幾斷腸、誰糜大局歎郎當。救時豪傑資姚宋、並世人才孰謝王。恩榜喜纔開甲乙、詔書旋復策賢良。疇憐憔悴幽閨裏、尚有風流時世妝。

來日茫茫覺大難、百年身世誤儒冠。力無可挽甘安命、事有難言托達觀。薄暮衣裳憐翠袖、驚秋情緒類齊紈。明知前路終相阻、猶作豪談強自寬。

詠史 壬子五月贈趙爾巽（該詩乃公之哲嗣敏行自鄉檢寄）

蘇峻兵氣逼石頭、義旗日日盼江州、陶公不是懷他意、似薄溫生第二流。

爲癭公題唐開元道士手書道經

歷歷開元在眼前、摩娑如拍洪崖肩、可能隨我黃冠去、日觀峰頭共聽泉。



辛酉春初先祠落成承荅西觀察丈惠臨並枉佳章次韻奉酬兼柬左子馨丈金芝軒李孔曼兄  
小築先祠奠几筵、高軒何幸降群仙。小山我愧稱求點、大筆公真似許燕。往事縱談成夢鹿、  
春心無那託啼鶯。何時復餞城南約、不負珠江好畫船。

又

江鷗野老坐忘機、何用驪駒賦日歸。世界雞蟲看日甚、亂離蛩駘可相依。慚無醫國三年艾、  
敢擬登山二子薇。自份沈舟難復起、千帆一任過如飛。

重修金紫閣落成喜賦次陳獨漉韻

龍山談故事、九日共登高。秀甲東西粵、形兼大小勞。重光逢此度、作記想人豪。喪亂休回  
首、吾年始二毛。

鼇峰新築藏山閣紀事

身後文章劫後灰、老來身世倍低徊。一菴天許供遲暮、萬卷書兼寓化裁。我輩自宜殷浩束、  
誰人解作史遷哀。高寒忽觸年時夢、又踏金鼇背上來。

荆鴻世講枉過杜鵑菴贈句依韻奉答

望帝年年志未酬、一菴猶是我春秋。見君飛動能無意、入世蹉跎卻自愁。病樹敢言先萬木、  
孤亭早擬賦三休。論交愧乏醇醪飲、猛蕙毋嫌共此甌。

奉答恭親王癸酉冬暮枉贈大作

勤王師恨漏多魚、往事思量一慨歎。滄桑坐觀三變過、島樓一別廿年餘。紫蛙幾輩今何在、  
枚馬同遊日以疏。何幸新京重捧袂、非君歲晏孰華予。

題心畬王孫畫冊

年少多文密國儕、青標尤似趙彝齋。無窮禾黍宗周感、卻付丹青寫古懷。

題箕坡侍郎垂釣圖

烏私得遂謝朝簪、偶向江湖寫逸襟。舉世爭傳疏傅隱、一邱誰會謝公心。爲留鴻印歸攜雪、幸未魚烹詠漑鱗。只惜天邊蒲藻夢、舊痕煙散更難尋。

丙午七夕偕了公愷公勛公同過荔裳處酒集用壁間詩韻賦贈

酒霞如陣令如軍、車子當筵更逸群。客裏雙星今又見、秋來一雁昨初聞。相看燕市裘都敝、尚乏監河潤各分。搖落天涯兩無賴、莫將身世判泥雲。

汪憬吾贈羅浮藤杖賦謝

我有杖材方而固、剗之爲圓便世路。入時翻召師夷嘲、垂老豈學邯鄲步。憬公不言默作計、爲易羅浮杖一具。天矯龍蛇驚入手、長養深山幾雨露。滑笏從知磨刮功、瘦硬恍從作書悟。連朝北郭衝泥出、蹢躅筇如驂斬附。歸看舊物委牆隅、卻似新縑對故素。用行舍藏我自參、理非墮甑胡不顧。嗟余半生行路難、夷險一致隨所遇。幸今憑杖未需人、肯改所持較醜媿。昔聞羅浮德長老、東坡贈杖佛面塑。十方三界歸掌中、請君新詩爲我賦。

贈羅浮道士鍾寶華

管領名山四百峰、霜姿如見後凋松。谷神自得羲皇秘、道氣還逾許椽濃。乘月吹笙常跨鶴、耕煙種草欲呼龍。何時得叩雲關去、策杖來尋採藥蹤。

對菊懷陶靖節

歲逢甲戌爲中山小欖第三屆菊花大會徵詩而作

一夕西風兩鬢霜、籬花每發憶潯陽。雲停八表昏同慨、桑種三年採未遑。自是無心知魏晉、只應有夢寄羲皇。微瑕白璧誰能議、人世唯爭晚節香。

菊叟畫餘

溫其球

先生字幼菊、晚號菊叟、鄉籍龍山、曾祖父汝适、清乾隆甲辰進士、官翰林院編修。祖父承悌、清道光元年進士、官刑部主事。父阡園、藝學泰西機器製造之事、清同光間、歷任軍裝機器局總辦、爲策劃製造汽輪船艦之先驅。其球先生、兄弟衆多、排行第五、少時以家藏名人書畫如林、由是寢饋其間、便耽繪事、旋又隨父兄到渤海灣一帶、曠其眼識、因曾一度任職旅順軍港、其後解甲南回、重理繪事、晚年居廣州、與東莞李鳳公、南海潘致中、台山趙浩公等在六榕寺組織國畫研究會、啓迪後學。抗日戰爭時流寓香港、於一九四一年星沉海角、春秋八十。先生遺作流傳不少、山水花鳥、多屏幛巨幅、其中尤以所作廣九鐵路沿線寫生長卷、凡三十丈、堪稱藝壇巨製也。先生間亦爲詩、惟不多見。事略與詩章、見民國己巳縣志、順德聯誼總會三十周年紀念特刊陳荆鴻輯錄之先賢文物版、中山鄭春霖編之嶺南近代畫人傳略、南海余少飄編之廣東歷代詩鈔卷八。

次林樸山居思草堂韻

壯哉遊遼海、時乎不再來。甲戌歲余從海軍艦隊抵北洋旅順威海各處軍港有詩勤脫稿、無酒懶擎杯。秦鹿方追逐、燕鴻幾往回。草廬人可作、指日戢雲開。

又

宅旁鼇峰麓、垂楊綠到門。不妨詩畫拙、自愧姓名存。學業惟期子、痴聾但弄孫。頻年風雨急、花落黯無言。

又

北塞歸來後、數椽隨遇安。漫嫌天地窄、且覓水雲寬。閉戶著書富、臨池呵筆寒。何時親大雅、堂集古衣冠。

温其球

仿任伯年別墅圖

温其球（一八六二—一九四一）字幼菊，號語石山人，晚號菊叟，龍山鄉人。曾隨父入海軍提督丁汝昌幕府，後辭職南歸，專志于畫。工山水、人物、花鳥畫。山水學石濤筆法，花鳥仿宋人，賦色敷粉有創意。



温其球仿任伯年別墅圖  
一九四一年  
語石山人

温其球

落梅五月久無向能揚游延  
 化青因回思廿五年有夢于今  
 風景不掃涕  
 癸丑借京香江道遠香不可忽  
 向空那北情是日曾占同家此酒暢揚  
 易情入夢探觸於依瘦成願白年  
 繪此圖以寄說 拜觀主人時于文



鄧華熙

鶴樓游燕圖

順德詩徵

納楹書屋詩存

鄧華熙

公字筱赤、又字筱石、晚號靜觀老人、鄉籍龍山。生於清道光六年、公元一八二六年、咸豐元年、公元一八五一年舉人、官歷安徽、貴州、雲南巡撫、加太子少保銜。晚年曾一度隱居香港、閒裏著書作畫、遺著有納楹書屋偶存、鄧和簡公奏議、鄧和簡公日記。畫學董其昌法、能山水花卉。至公元一九一六年卒於鄉居、壽九十歲、賜諡和簡。詩章與事略見余少飄編之廣東歷代詩鈔、汪兆鏞編之嶺南畫徵略續錄、何竹平編之學海書樓七十周年紀念文集及林家強編之丹石藝文集。

洞庭阻風

洞庭之水何瀾漫、西連青草東君山。江豚吹浪浪澎湃、回檣欲泊殊艱難。我舟早艤黃茅港、連艫巨索交相攀。須臾東北大風作、排山倒海銀濤翻。岳陽城頭浪花立、彭蠡江干夕照殘。大舳小舳遭飄蕩、破篷斷舵翻狂瀾。問誰能救衆生苦、幸有菩薩臨華壇。慈航出沒虛空裏、寶筏隱現浮雲間。自注指救生船職思人溺如己溺、易地則同禹稷顏。退飛鷁首喜無恙、脫茲魚腹再生還。險定思險情不異、并舟聚語心相關。鳴舟拊鼓答神貺、淞鱸鉅黍歡宵餐。蕭蕭風雨路漫漫、鳴鼃亂吼更已闌。挑燈不寐獨愁坐、兒童蒙被徒雄鼾。河魚胡爲有腹疾、使我不耐江風寒。焉得南風吹澧蘭、漣漪萬頃陰霾刪。朝暎金彩懸蒲帆。長風直送漢陽去、鶴樓吹笛倚危欄。

題石畫

突兀影疑動、崢嶸勢欲顛。古雲封半面、怪石奮如拳。晴日饒明翠、深宵生冷煙。飛來何處是、移向米家船。

題自寫鶴樓游宴圖并識下款云癸丑僑寓香江適逢蒲節忽憶旬宣鄂北時是日曾與同寅游宴

黃鶴樓前情如夢，棖觸於懷戲成捷句。

落梅五月久無聞，鶴樓游宴記前因。回思十五年前事，於今風景不堪論。

### 宦浙詩稿

鄧本達

先生字用甫，鄉籍龍山，華熙和簡公哲嗣。清同治四年生於北京，幼承家學，歷任浙江寧波知府兼浙紹台海防兵備道、浙江海關監督及創辦浙江法政學堂，於保衛海防振興教育禁種鴉片等、政績彰彰，至鼎革之日始將事功全部移交清楚，臨別浙民，夾道歡送，不勝依依。自此歲月優遊，至一九三七年卒於穗城，春秋七十六。遺著有宦浙紀要、納楹書屋筭記、鄧和簡公年譜等。惜言志之章，則流離散佚，僅得其哲嗣又同君從舊匣中錄出二首。

#### 宣統二年孟春西湖謁岳墳

薄霧春寒謁岳墳，四郊多壘憶將軍。古今名將知多少，武略文韜獨許君。

#### 宣統二年仲秋與同僚登普陀山

佛門勝境普陀山，到此勞人意亦閒。梵宇鐘聲塵夢醒，回頭是岸寸心間。

### 老漁詩

鄧泰

先生字心蓮，鄉籍待考，事略不詳。詩章見嶺南詩存並附注爲順德人、諸生。

#### 寄雲諸了子

詩病入秋深，秋歸人懶吟。無窮寥落意，況有別離心。細雨寒於雪，疏更響亂砧。此時思舊侶，都向夢中尋。

#### 秋蘆

風景老漁識，花飛雁亦飛。昨宵霜氣重，一水月光微。蕭瑟有歌意，江鄉吾欲歸。鱸魚新釣得，羹伴筍芽肥。

實廬詩存

鄧秋枚

先生名實、號實君、鄉籍水藤、公元一八七七年生於上海。先後在上海與同邑黃晦聞組國學保存會、與安徽黃賓虹組神州國光社、致力出版國粹書籍事業、爲世所重。先生餘事亦爲詩、與弟秋門頗多相應之作。一九五一年卒於上海。事略詩章見福建省陳衍所編之近代詩鈔、惠陽許衍董編之廣東文徵續編及附錄於小雅樓詩文集之內。

與秋門聯句

著書西北窗、疏林過微雨秋枚、遙見隔溪山、時有僧來去秋門。

秋夜檢亡弟秋門遺詩

白日忽已暮、西風吹我廬。幾日不出門、庭葉落已無。大野空蒼蒼、寧爲載愁區。來日適大難、去者不可呼。海水日夜東、暫留難斯須。嗟哉我弟兄、壯歲多崎嶇。南北萬里別、坐哭天一隅。天寒各歸家、慘慘顏色枯。生無一命寄、死無一日娛。汝歌動我懷、汝吟憎煩吁。汝病我鋤藥、泥足荒丘塗。暮歸坐床頭、寒燈照人孤。一朝辭我去、埋骨青山墟。月明荒草碧、萬古長歔歔。我悲汝不知、辛苦獨愁予。愁予亦已矣、生死竟何如。寒風吹敝帷、秋堂夜空虛。黯黯青楓林、魂來若模糊。展篋欲吞聲、終宵自躊躇。俯仰千載名、人事恐見疏。感此不能寐、起行步前除。草蟲鳴我旁、微霜沾人裾。

題徐俟齋畫山水

故山如在有無中、堪歎遺民落筆工、賣畫驢歸人獨坐、數株松翠晚搖風。

題秋門羊城雜詠二首

江東詩句阿龍超、白紵歌詞紫玉簫、我倚紅闌聽不得、殘鴉煙水柳波橋。  
離宮青草粉田秋、破帽殘衫駐短驕、莫向珠船吟到夜、瀟瀟暮雨海東頭。



寒食前一日書粵秀山紅棉草堂館壁

山半朝臺草樹微、禁煙時節雨霏霏、鷓鴣啼煞行人駐、盡日紅棉滿路飛。

泊煙台

海燈光不定、舟左見煙台。列嶼番人屋、防秋水將臺。島迴千戶出、浪擁萬山來。坐棄重洋險、中流互市開。

黑水洋

己及登萊境、浪花深百尋。日光紅欲隱、蜃氣白逾陰。滄海曾經客、重洋百戰心。舟師空北道、遙望自悲吟。

海上春懷

江干楊柳綠垂絲、誰倚空城篴一枝。異國風煙寒食後、孤臣氣味落花時。江郎舊作銷魂賦、伯玉新吟感遇詩。太息年來苦流落、殘春鼓角不勝悲。

又

閉門書帙坐無聊、咫尺家山望轉遙。病酒光陰春似海、怯寒簾幕夢如潮。黑貂裘恐長遊敝、駿馬圖休沒骨描。又是江南芳草綠、王孫歸去正魂銷。

又

尺八紅簫尺五天、人生能幾比華年。江湖我輩仍詩酒、樓閣何人日管絃。故國青山銅作柱、舊遊滄海玉生煙。向來捫蝨輕王猛、皓首功名自可憐。

又

白袷青衫憶少遊、此生燕領愧封侯。才華草草虛名士、人海茫茫只濁流。憂國杜陵悲入蜀、依人王粲故登樓。百年世事多奇變、爭戰今聞五大洲。

鄧秋門肖像



小雅樓詩文集

陳秉昌題



上冊

先生名方、字方君、鄉籍水藤。清光緒四年、公元一八七八年生於上海、光緒二十四年、公元一八九八年卒於鄉、年僅二十一、而能以詩文足傳後世、爲我順德五百年來不可易得者。先生年十七南歸、嘗與兄秋枚游於簡岸先生草堂、研習經史、弱冠復北游燕趙、時當國運蝸蟻、故所歷山川都邑、輒生無恨感慨。伍憲子先生曾以後先同門簡岸草堂之誼、有序其詩文集云：「秋門好談兵、好吟詠、慷慨悲歌、有杜陵劍南之志、時當甲午敗後、國微政衰、少年人激昂之氣未斂也。」此蓋伍先生能道出秋門之悲憤而包括在臺彭之失而有以言之也。秋門歿後三年、所遺小雅樓詩文集、爲其兄秋枚爲之刊行傳世、以揚正聲。時公元一九零一年。至公元一九九零年再得同邑伍絜宜博士重付梨棗、董其事者、同鄉何叔惠先生也。

## 論詩

詩學三千年、自謂頗窮源。五嶺風雅衰、誰能抗中原。千秋論長篇、無過李青蓮。杜陵格儘大、最愛哀王孫。詠懷與北征、萬古此五言。暮年賦諸將、偉律何聯翩。退之後起雄、錢天摩斧斤。長排創仄拗、奇峭不可捫。孔雀東南飛、格在白傅先。長慶變初唐、此事始娘娟。願言嗣玉溪、自知乃自憐。流易與僻澁、兩兩俱失焉。蘇黃頗別出、要以古詩傳。渭南海橫流、膚俗開旁門。哀哀望兩河、獨使人肺酸。岿岿元遺山、兀兀虞道園。飄飄高青邱、惻惻吳梅村。元子獅搏象、高吳鴛匹鴛。元風虞最醇、老吏當時尊。七子杜陵兒、語詩必開元。時遷情亦遷、貌存神不存。明季楚人咻、夫誰障狂瀾。開國有正聲、雲間其發端。秀水味彝尊、松陵吳兆騫。新城王阮亭、海內之崑崙。細腰以取妍、不屑查趙倫。藥亭養馬行、元孝王將軍。詎須勝江南、自是鄉國賢。願從李杜後、羅取諸公純。何爲性靈主、何爲時代援。

上窺漢魏垣、古義風仁敦。

大科峰

西樵七十峰、茲峰最岑竦。倒影壓地黑、過馬盡驚駭。呀厓石搖搖、平頂霧滃滃。藤村好奇者、觀日攜被籠。瘴蒸夢成魘、風侵目生腫。冥海萬里黑、其氣灑面凍。極天雲一線、眼明日上捧。駁色浴血光、圓景綴雲孔。下有紅百圍、想見海水動。回睨東西峰、得日黃洞洞。半作額塗妝、而皆貌偃拱。是時寒氣漫、露裘鐵稜重。騰杖曉色開、墊巾落霞擁。已尋石列飪、旋就潭釣鮓。

吳淞江口觀音閣坐月

涼風吹雨過、海水萬頃碧。飛閣對吳淞、返照射畫壁。壁上雲氣開、古佛露鐵脊。我來待明蟾、焚香坐瑤席。道士暮不歸、瓦鼎餘素食。紺殿氣冰冷、下睨見飛翼。溟濛淡水洋、月出若可摘。皓皓天河秋、磊磊疏星夕。迴睨寶山城、城影水中黑。沈酣萬家夢、上有片月白。是時聞哀鴻、淒切不可極。無人伴清寒、兩鬢上江色。但見白衣神、佛火光寂歷。

火車中望都城諸山

曉月下盧溝、行人坐山脛。出郭未五里、巉巖峙萬嶺。拔地形鸞翔、竟天勢馬騁。玉泉頗蜿蜒、錦屏獨修整。巖去奇若失、峰來美先逞。崑霞鶴背晴、初陽雁邊炯。西山百枝幹、下盤十萬井。遙知登高人、俯見田稜稜。千仞青巒岫、秋色壓我頂。西風吹枯山、野火燒亂梗。車行迅風飄、驚魂與輪迸。揮手謝山神、遙見飛鳥影。

去滬城

萬里關山月、孤舟草莽臣。故鄉三徑地、人事五湖身。北海原憂漢、東園莫隱秦。夔龍飛不久、蹶躅暫風塵。

甲午季冬乘番舶南歸小泊汕頭

馬嶼黃塵外、鼉江赤日西、人煙通百越、兵嘯憶三齊。志事休王粲、功名有范蠡。橫流嘆滄海、何地覓鹽齏。

邑城

沙白門人壘、山蒼義士墳。荒祠三月雨、古縣一城雲。衢路來私祭、旌旗壯舊聞。伏波橋下水、曾此沒鄉軍。

夜入香港

人聲滿江月、吹器夜停舟。水黑春濤闊、風高曉角遒。帆檣紅海客、燈火碧山樓。忽下南洋涕、經營尚五洲。

南入廣州

竹枝歌起處、細雨入交州。蜃氣蒸山堞、巒煙結海樓。屠沽尋死士、兵火託孤舟。重海貂裘敝、吾思馬少遊。

粵秀山懷古

廣州城北嶺、故址越王臺。兒女雄風盡、雲山王氣來。晚煙芳草冷、春雨杜鵑哀。一片南強國、佗劉亦霸才。

與君實兄南歸留四弟在滬人來日以詩寄之

爾客春申浦、江湖各側身。梅花五嶺夢、春草六朝人。吳語憐嬌妹、鄉心慰老親。嗟余同越鳥、淒斷向征塵。

藤村歸權

西風下黃葉、海水亦東還。落月長鯨醒、平原戰馬間。掛帆林岳渡、吹壘碧江山。前路黃昏

近、牢愁喚小蠻。

小蠻酒榼名見白香山詩  
有攜得小蠻來之句

與同學黃四晦聞任二子貞家兄君實午出北郭小飲寶漢茶寮觀馬廿四娘墓卷

落木急寥空、蒼涼秋色中。重城臨越秀、萬嶺導南雄。霸氣殘山紫、冗人古柳紅。茶寮話金石、酌酒向西風。

甲午長江書感

寒濤動地大江秋、傳箭移軍鎮上游。宣武雄兵稱北府、謝元高節建揚州。魚龍夜雨瓜州鎮、鴻雁清霜海岳樓。此地由來征戰苦、鼓鼙聲裏使人愁。

前題之二

舳艫千里上公旌、暮氣湖湘百戰兵。京口邊歌聲滿幕、鑿江夜角雪連營。分糧士行臨中渡、拜表元規擬北征。聞道和龍前出塞、海風宵入鳳凰城。

匡山行

王氣煙銷憶武林、兩厓雲雨晝陰陰。胡塵幸免青衣辱、仙馭猶聞玉璽沈。燕市啼鵲君已去、吳峰立馬虜初臨。頽垣冷落慈元廟、回首中原淚滿襟。

臥病

寒城兵食久侵尋、臥病江關自閉林。近海荒涼時斷酒、登高孤迥易聞砧。殘村橘柚人煙晚、故國梧桐暮雨深。消息歸鴻近無據、虎門潮信昨宵沉。

舟中醉題

掉首樓船天上關、蓬萊半在有無間。一川驟雨龍辰徙、滿島腥風鱷夜還。醉倚吳歌思上海、臥乘大舸過茶山。苦聞黑水多風浪、滄酒無因得解顏。

大沽口

鬱鬱人煙徐市城、舳艫登眺暮雲平。重關落照來邊隼、一海涼星嘯夜鯨。習戰旌旛西將隊、和番繒帛上公盟。進軍白首閒吹篴、半是遼陽徹後兵。

津門旅店題壁

江天無際水生波、山色陰沉太史河。北道黃花征客驛、西風紅豆美人歌。重關馬色迎寒早、古堞鴉聲向晚多。此日已無屠狗輩、匣中孤劍自家磨。

羊城雜詠

小樓秋思五羊城、藥裏茶鐺最不情。一卷吟殘花信集、木樨如霰落簾旌。

又

倚遍闌干恨不平、海山樓下舊連營。寒潮暮雨珠江渡、幾箇殘軍話卞京。

又

五更秋露下精藍、小北門前策曉驂。聽說燒香多韻事、黃綈襖被鄭仙巖。

又

野棠紅豔草如薰、步履尋春上白雲。解事城西諸女侍、酒痕狼藉二喬墳。

北上留別閨人楊依依

三年夫婿別離多、後夜孤舟又九河。黃海重重山鬱鬱、擁襟誰唱定風波。

附錄楊依依送外子之京

浮雲西北帝王京、衰柳荒江又送行。此去且休論得失、科名原不當功名。

題百年畫冊小景二首

石橋帶橫溪、扁舟入何處。江樹雨濛濛、煙中數人語。

鳥驚山日高、風動巖泉皺。亭午不逢人、春雲出谿口。

補蠹山人詩存

鄧其鏞

公字衛同、又字子俊、號補蠹山人、鄉籍龍山排涌。清同治甲子、公元一八六四年舉人、著有補蠹山人詩存、事略與詩、見乙亥溫肅輯錄之龍山詩錄卷下。

四里村莊廟小憩偶書并序

黃河秋漲津逮綦難旋聞四里莊可渡因與戴老並騎入村曲問津津梁告疲忽見小廟廟外長松蔽日疏柳招涼草草勞人憩此爲之蘇息盤桓不舍即景成詩時七月五日也

青驄連韁蹋穠綠、側帽垂鞭入村曲。長松映日漫碧雲、幽澗鳴泉瀉哀玉。古廟藤蘿恰停轡、淺草沿階作蘼蓐。忽逢馬艷飄天香、斜亞疏籬媚幽獨。爭春知讓城市姿、憔悴憐教倚修竹。嗟我征人正勞瘁、芳信無端值空谷。紅日滿山騎馬行、回首橫雲望喬木。

高臺花影曲

天高日淡羅雲輕、幽花作態相逢迎。軟紅嫣然背人笑、晚霞映玉彌晶瑩。衣桁羅衫作香障、晴絲牽風互駘宕。認是芙蓉呼小名、斜映紅闌臉波漲。伯勞向東燕自西、碧葉高翔花自低。梨雲夢中路約略、畫柳西畔多柳荑。花魂亭亭不解語、廣寒桂陰響霜杵。月黑煙深奈何許。

韶石詩存

鄧顯

先生字石琴、鄉籍龍山排涌、清代布衣、著有韶石詩存。見溫肅輯錄之龍山詩錄卷下。

論詩絕句

遺集千秋重雪聲、忠臣原不藉詩名、一腔熱血臨流灑、淒絕匡門弔古情。（陳尚書邦彥）  
蓼莪當日隱銜悲、患難磨砢愈出奇、懷古諸篇人膽炙、早年疑勝晚年時。（陳錦衣恭尹）  
傾倒諸家舌並鏡、怒猊抉石喻尤超、鳳城不少能詩客、一瓣香誰奉二樵。（黎明經簡）  
苦思冥索如東野、神髓面兼得玉川、漫笑詩人陳小鄭、不能豪闊似寒蟬。（陳大令同）



吟詠頻年劇苦辛、爭名終自失天真、桃源幸有流傳句、戢古能否勝古人。（黃孝廉璞）  
多浦吟哦早歲工、交遊大半屬名公、九重下詔徵詩草、誰謂詩人際遇窮。（胡多浦亦常）  
綠窗吟課早蜚聲、香石曾經細品評、雲路松陰詩特妙、天教菊月擅詩名。（邱女史掌珠）  
題黎佛桐（坤）詩集後

才高骨傲性情真、吮筆成吟迥絕塵、一語告君應首肯、花南溪館後傳人。

### 梅花書屋詩稿

鄧彪

先生字獻升、號炳園、鄉籍待考。清代歲貢生、著有梅花書屋詩稿。見粵東詩海卷七十七  
歸雲

豈不誠高曠、無心去復還。九秋銀漢路、一片夕陽山。未逐龍文變、聊尋鶴夢閒。煙霞吾欲  
枕、遲爾石樓間。

### 訪覺天大師

上方消息夢猶慳、此日招攜自解顏。一院人天歸麈尾、廿年雲水起龍山。詩成幽處花爭細、  
月入虛堂鶴共閒。爲問肩輿懷刺者、不知曾許扣松關。

### 寄園吟稿

鄧瑞瓊

女史鄉籍待考、清代庠生鄧桐之女、詩二章、見溫汝能纂輯之粵東詩海卷九十七、僅注上  
書數字、事略待訪。

### 鶴山寄園雜詠

滿目煙霞野興饒、數間亭院截山腰、月明檻外竹竿影、難掃階前月色消。

### 前題之二

戶倚山巔似接霄、風清月白慰無聊、漁燈別港光侵閣、愁借松濤鶴唳消。

順德岑雯著

柳廬詩鈔

一九一二年作者編定  
一九八四年重訂刊行

先生字簡菴、鄉籍桂洲。生於清咸豐癸丑、公元一八五三年、卒於公元一九一三年、春秋六十有一。少從番禺陳東塾先生讀書、通經史百家、惜數奇、屢試不第。乃專志於講德授業於鄉閭之中、病始就醫羊石、以此終老。遺詩本自定稿、以世事遷延、至公元一九八四年始由其孫公燧先生得開平利君榮森新會李君巽仿以夙有師生之誼相助、付梓傳世。

生日兒輩進橘有感堯轅弟

予生癸丑冬、十月廿八日。予弟少一年、日同月逾一。予弟壽我辰、年年有橙橘。嗜好雖不同、羊棗真余匹。物淺意愈深、性真情自悉。由來我同枝、橙橘俱甜蜜。連理發幼條、交柯延秀質。馨香入君懷、婆娑映予室。豈知一夜風、別我去蕭瑟。循彼荜下梯、嗟哉徒剪勿。顧我亦孤根、能否植芳蕝。願君夜夜來、書室盍舊帙。無使橘柚甘、人琴異存失。

游青雲塔

未向青雲行、已唱青雲詩。晴午偶客談、輕舟借相宜。一葉絕蓬礙、流波濺我衣。濺衣且游騁。風波何能爲。鳧啄逐松浴、漁飯曬網欹。山骨媚倒影、忽圍青玻璃、雙塔見青霄、一塔林芳菲。八橋不可辨、碧玉分流隄。洳洳雲徑口、慘鬱尤參差。萬木一線梯、木棉紅落階。即地見仙境、何論塔雲齊。卻惜塔絕頂、獨少朱闌規。抽刀向壁粉、好山笑吾題。金鈴命青鳥、爲呼魚與龜。縣志稱塔下小龍鱗勢游天、視若蟲齧齋。東風從東來、巾拂隨雲飛。雲飛半天外、不知身處危。高危不可居、極目萬里迷。三百有餘秋、來者名士誰。吾生五十八、三登凌雲倪。愧無盛文章、留與看巍巍。

壬子八月臨池後題

遭亂亦彌年、今朝纔放筆。書自心精華、風流轉鬱勃。是否到古人、先傷從老佛。千秋復何

言、一任雲煙失。

絲亭行

南順之間有所謂機器繅絲廠者工用女郎數百煤突雲漢飛灑閭里輒滋事端賦此以俟採風於他日也

急繅絲、急繅絲、晨閨驚夢機筒吹。機筒吹幾處、薄洗粧梳促前去。大婦中攜少婦行、女郎二八偏娉婷。十五五趨絲程。日暮放工尤態呈。青絲手榼雲鬢輕。縹紗半臂霜跌清。惹來輕薄羞嗔楨。背媚羅敷金自矜。絲亭高高天尺五、漫霧龍饒日亭午。談談驚走龍害人、東家崇蠱西家苦。自從機器中土錯、繅絲幾奪閨中作。群雌粥粥繅絲鳴、汗香流灑男女并。蘭波勺浪不可平。龍嘘變拂桑條青。蠶飢無奈龍臭腥。食入魚塘魚不尺盈。吁嗟乎、千呼萬禱龍不應。依然渾渾黑鬣蒼濤乘。絲亭正有豪家擊。君不聞豪家擊。香油徵。家家日夕爭絲亭。

乙巳自題小象於平安館

不可食無肉、不可一日無書讀。堂舒樓複、山明水縉。賞花題竹、以似以續。以似以續、耕田寶穀。惟平則安、平安是福。

吾邑重修學宮兼構中學堂於孔林李太史書稱舊林有鶴邇亡今工成忽集有朱頂者衆異其來因請以詩

鶴生乃在三山碧海搏雲煙、何年十五五夫子宮牆翩。不知幾年復飛去、無因夢見車輪駢。一朝驚口群流泉。九皋清唳聞九乾。東封舊話天壇元。杏壇鳳喜丹青鸞。毋乃崑山懸圃來游仙。仙人息駕垂紫鞭。鶴兮由汝多周旋。踏翻舊雲書堂連。書堂雲煥林尺千。離纒縹蚴龍半天。竽筑瑟鼓風鞦韆。月明金粉飛前軒。丹砂倍覺日月赤、少別豈信須千年。有客登樓警露先。銜書誰是衛濟川。孤高本自不闞俗、未聽書聲難應絃。鶴乎迎我西湖舷。我壽汝鶴江南

篇。有生善處吟啄地、大笑一一還我真青田。

丁未秋登新會丹竈鄉白雲頭山爲伯仲兄及堯轅弟立墓石

白雲頭上白雲流、鯉魚嘴山中各一下鯉魚游。十文含吐皆碧玉、四時蔥鬱見青楸。同根終古三墳合、遠地斜陽片石留。倍憶孝廉哀賦在、滿山風雨送歸舟。

海樓放筆時當澳門畫界

青玻璃界筆驅煙、插處青峰莽萬千。須信波心危有地、豈妨詩膽浩如天。當風快逐雄王後、賦海爭凌異族前。真是樓臺吾是主、山河金色舊皇年。

重開南園詩社社設三大忠祠


遐芬季漢三北海、清游吾粵幾南園。正憶舊懷荒夢在、欣聞雅集古壇尊。先師篆墨猶留榜、何處詩經復有村。明穿河間毛萇墓得石志天下文章今莫大、更誰提劍大忠門。

己酉春孫公燧入京謁其父其父始教之書初夏家人將其字寄回喜而寄示以詩

六齡孫雛翻鴉塗、鳳雛雀雛京弄初。雪中一月八千里路餘。暖雲半月二十七紙書。竹林水鳥隨意畫、龍虎馬牛氣不窄。三經四史勢往來、一二彷彿北魏拓。上四句皆所寫之字吾家臨池多舊聞、越漢中郎晉右軍。邈斯上獵岐陽鼓、顛素亦逼羊欣帽。爾不聞山陰童齧筆緊運、於菟食牛三日迅。胸中道義山谷峻。筆下卷軸草堂韻。學書須洞古人神、讀書須識天下全。人生萬學文字始、一藝瑣瑣空憐困。千門荷氣清無塵。紅窗攀几初日新。勗爾鳳雛學鳳不學雀、鸞坡鵝掖多風雲。風雲且屬等閒物、老夫傳爾一枝筆。

諸孫嬉戲求詩即事口占二首

五十年前我幼時、得句尋春尚記詞。劈紙諸孫渾是戲、聲聲爭與學催詩。  
新橙分賞亦含飴、卻喜床頭爲折枝。更把古今癡細事、就中試說與傳奇。



# 鶴禪集



周 頌 禪 集  
周頌禪集  
頌禪集  
禪集  
集

先生名孝憲、字敏仲、號鶴禪、鄉籍桂洲裏村、乃簡菴公之哲嗣。清光緒二年公元一八七六年生於原籍古巷社祖居。年十六年即與胞兄光墉同受業於簡竹居先生之讀書草堂、光緒三十年恩科殿試登進士、光緒三十四年畢業日本法政大學、受職翰林院編修、賜侍講銜。辛亥革命後、即南下回里、一度曾到羅浮山中、問道於東官陳伯陶、其後應增城賴際熙之邀、到香港講學成達書堂、歷任香港官立中學、漢文師範日夜校講席、公元一九二三年又與賴際熙、陳伯陶及清遠朱汝珍、南海區大典、區大元、同邑溫肅合七人、皆遜清翰林院學士、在香港創立公開國學講座曰學海書樓、以傳至今、編者現忝該書樓主席、信筆到此誠有無限羹牆之感。公元一九四六年、先生之哲嗣公燧、公弑、先後來港復任教職、翌年喬梓同心、開設成達中學進爲居港各界子弟培育、至公元一九六零年、先生以八五高齡病終養和醫院、該校便隨之停辦、惟餘韻流風、至今猶有存者。該集之刊與柳廬詩鈔齊出。

爲張谷雛題彭竹本先生畫卷

草書嘗聞竹本派、餘力更肆竹石奇。草書寥落不可見、竹石磊砢何淋漓。千竿一卷擢秋骨、疑與造物同鑪錘。想見醉墨時落紙、氣凌顛旭儕張芝。吾邑逸節寄書畫、後起藉甚二樵黎。不知相望孰尹邢、谷雛先生誰與歸。

島居講學將有他適同事諸公飲餞各爲詩歌贈行賦此奉酬

海角乘桴年復年、鬢霜簇簇盈吾顛。憑闌每誦登樓賦、理楫方草歸來篇。諸公祖帳意良厚、酌我嘉粟醉一斗。雅調臨歧續續彈、馬遲枚速皆瓊玖。愧無清音和刻羽、報以凡響聊擊缶。人生離合各有時、此別何須怨楊柳。我行今如波上萍、我心銘此杯中醪。諸公雲翼期南溟、野鶴還守寒松青。

張詠琴六十一生日其女公子曦丹畫鸚鵡紫菊秋葵直幅介壽屬題

纖纖素手擅丹青、細寫蛟綃作畫屏、鳥自能言花解語、也來齊祝大椿齡。

題胡伯孝湖濱偕隱圖

日月曾幾何、江山不復識、言念畫中人、今爲島上客。平居抱雄略、吏隱聊自適。結此人境廬、巢枝棲比翼。六橋秋水闊、清風抗蘇白。一朝避地去、州里復蠻貊。回首舊釣遊、山水留破墨。知君意不忘、尚作滄州憶。竊聞達者言、天地原匪窄。世變如轉轂、去住安所擇。隨意即桃源、澄心君自得。

甲申（公元一九四四年香江日治時期）除夕

欲行無坦途、欲止無餘儲。嗷嗷食指百九十、筆耕墨稼庸濟乎。況復長天警風鶴、巢危幕燕憂池魚。決然便欲故鄉去、故鄉田園半已蕪。懸知生計自彌苦、固窮自守先人廬。束裝待發兩圓月、航停道阻防不虞。至今引領望鄉樹、百花洲尚雲模糊。待借櫂槍掃雲霧、寒日冉冉先歲除。明朝大地放春色、有酒聊復斟屠蘇。

梁覺民八十有二重遊泮水有述懷詩寄示賦答

大年已過杖朝時、世變侵尋似奕棋。壞壁幾經秦相火、泮林空憶魯公旗。餽羊愛禮差堪賀、鳴鹿重歌會有期。好把黃花娛晚節、故山鶴侶正相思。

代桂洲集義善社贈醫師李廷芬

隴西秀毓才自奇、不爲良相爲良醫。淵源五葉承弓冶、經方脈訣窮軒岐。桂溪作業十餘載、壺天露灑如楊枝。年來辱就吾社聘、鍼育起廢宏其施。殫心義診寧望報、介若原粟九百辭。濟飢恤寒百待舉、謂宜挹彼堪注茲。感此高義薄雲漢、痼瘵在抱世所希。君不聞古稱國工秦和緩、先生學術儻庶幾。又不聞萬家生佛宋司馬、先生仁問無差池。願爲窮檐頌嘉德、傳之



萬口皆成碑。

### 成達中學校歌

校樓翼翼起門牆。鬻模舊拓伊重張。朋來濟濟自遠方。志道問業期皆臧。端蒙養、進中行、切磋教學多商量。群言淆亂折諸聖、大道毋使歧亡羊。新知培養還博涉、兼綜中外咸成章。崇實用、戒囂張。雞鳴不已凌風霜。樂爾群、同爾方。萃爾力、集爾長。明體達用貞厥常。鬱爲時棟爲國樑。庶幾達材成德名副實、皎如旭日升祥光。

### 謝故人問疾

白髮垂垂將過耳、一病兼旬幸不死。留將冷眼看滄桑、欲問滄桑還有幾。頗疑先德猶相余、眠食兩可還故吾。故人情厚堪告慰、邁步已屏筇杖扶。山齋日長一無事、蟬鳴荔熟當清娛。興來擊窠二尺餘、醉墨尚可煙雲驅。

### 自題八十歲道服小象

道其所道、幡然一老、三淺蓬萊、安知故我。

己亥生朝感賦三首并自註（公元一九五九年先生八十四歲）

丙申十月重逢花燭迄今四載尚能共保龍鍾初非意料所及

曩時花燭也重經、客語曾叨祝鶴齡、攬鏡卻知人易老、華顛相對兩星星。

光緒己亥科考進庠忝居首選先君子爲題謁祖聯有忝掇宮芹第一人之語今歲恰值重遊泮水回思過庭時如寐不勝百感交集

彈指滄桑六十春、芹香初掇話前塵、君親莫報知何用、愧說當年第一人。

老來俯畜已無力差幸兒輩尚能修南陔之義於心竊慰幼孫善承色笑亦自可樂

觴稱鞠卮年年有、詩補陔蘭續續聽、更喜今年萊舞會、平添新秀小寧馨。

簡竹居先生遺像

後學利榮森敬題

